

ASO TOFI, 18 IUNI 2020

Na nofoia e le Fofoga Fetalai le Nofoa i le itula e 9:09 i le taeao.

FOFOGA FETALAI: Ou te faasilasila atu ua toe amatalia Taulumaga a le Fono Aoaofa Fautulafono.

Ou te faatalofa ma faafeiloai atu i lenei taeao fou i le maleifua mai i le lagimama ma le soifua manuia i lau Afioga i le Palemia faapea foi lau Afioga i le Sui Palemia ma le Kapeneta aemaise foi o sui usufono mamalu o le Palemene. Ou te faatalofa atu foi i le paia o le aufaigaluega a le Malo i tou susuga i Ofisa Sili o Pulega o Matagaluega ma Faalapotopotoga i lenei taeao.

**TULAFONO TAU FAAOFI O LE FAATATAUINA O TUPE
FAAOPOOPO (NU.3) 2019/2020 & TULAFONO TAU FAAOFI O LE
FAATATAUINA O TUPE 2020/2021 – felafolafoaiga i luga o le
faitauga faalua**

FOFOGA FETALAI: O le a faaauau felafolafoaiga i le Tulafono Tau Faaofi. Ma e tolopo galuega a le Fono Aoaofa i le po anapo ua maea ona saunoa le sui usufono mamalu mo Vaimauga Sisifo Nu.1. Ia, ma lou faaaloalo ou te tapa se isi sui usufono e saunoa, ua avanoa foi le Palemene mo le faasologa o saunoaga a sui usufono.

Ia ou te tapa le sui usufono mo Aleipata Itupa i Lalo lau fetalai i le Matua.

Afioga TAFUA MALUELUE TAFUA (Aleipata Itupa i Lalo): Faafetai i lau Afioga i le Fofoga Fetalai. E faatalofa atu i lau Afioga, malo le soifua maua ma le lagi e mama. E faapea foi ona ou faatalofa atu i lea Itu o le Maota, talofa Tuilaepa, malo foi Fiamme ma le paia o le Kapeneta ma Minisita Lagolago faapea foi lenei Itu i Taitaifono ma Sui Taitaifono ma le mamalu o le Palemene. E faatalofa atu foi i le Ofisa o le Fono, Ofisa Sili o Pulega o Matagaluega Tumaoti ma Matagaluega foi nei tumau.

Se i ou faapai lava i le atunuu e faigata le lauga mua. E faatulou atu i le tapuaga a Lana Afioga Mamalu O Le Ao o le Malo faapea le Masiofo, le Sui o le Fono a Sui Tofia faapea foi le Faamasino Sili ma le Vaega o le Faamasinoga. Ua uma ou faatalofa atu i le tatou Pulega i le Kapeneta ma le Afioga i le Taitai o le Maota aemaise lau Afioga i le Fofoga Fetalai ma le paia o le Maota nei.

Le faafofogaaga a Samoa i Aiga ma Tama, o Tama ma Aiga, Tumua ma Pule, Aiga i le Tai ma le Too o le Fua, faapea foi nai o tatou uso i Amerika Samoa, Sua ma le Vaifanua, Fofu ma Aitulagi, Tootoo o le Faleula ma Tama a le Manuatele, aemaise le Motusa ia Manuatele.

E faatalofa atu i Maota e Lua i lau Afioga i le Kovana i si au uo faapelepele ia Lolo faapea foi le Peresetene aemaise o lau uo Savali o le Fofoga o le Maota Maualalo. Ia o paia faataotooto na o si o tatou atunuu e amata mai Saua seia paia Analega, o paia na mai le vavau seia oo i le faavavau, e le toesea pe faaopopo se iota.

Ou te faapai atu foi i le aufaigaluega a le Atua o Ulu ma Faauluuluga o Ekalesia taitasi, e le gata i lea o le lasilasi o i latou o lo o toovae aua le manuia o Samoa. Ua uma ona e osi le ta taulaga i lenei taeao, ma ou te faafetai ai i le Atua ua e noanoa le taitua ae manoa le taisua. Ua tele lava upu i manu ae itiiti i mala e pei o lea upu. Ua taliga e fialogo foi le tala e pei o le upu e faia i le mauga o Salafai. Ua logo faatutuila lenei Maota i aso e lua ua tuanai atu o saunoaga a sui usufono mamalu e le gata o manaoga o latou itumalo taitasi ae faapea foi ona tuuina atu le latou lagolago i le talia o le Tala Autu o le Tupe 2020/2021 e faapea foi le Tala Faatatau Faaopopo Lona Tolu 2019/2020. Ma e moni ai le saunoaga a le Minisita o Tupe. E momoli atu foi le agaga faafetai i lau Afioga aemaise le Ofisa Sili o Pulega o le Matagaluega o Tupe mo le tala auiliili o le tatou tupe. Ma e moni ai le upu, ia o lena e i ina le tofa ma le moe, sa e saunoa mai o lea ou te manatua, na ou fesili atu foi ananafi ia te oe, manaia foi nai ia faaupuga na e saunoa faapea, ua tele le manao e faaleleia uma ai vaega o le atunuu ae paga lea ua noanoatia pea lauulu o Taemanutavae ona e fuafua tatau galuega uma i tupe e mafia ona maua mai i a tatou lafoga. Ia e pei ona ou fai atu o lena e i ina le tofa ma le uta i lau Afioga. Malo.

Ou te faafetai foi i le Afioga i le Minisita o Tupe Maua aua foi o alagatupe ia tatou te faalagolago i ai, atinae uma ma totogi o tagata faigaluega a le Malo. O le sao malosi lea e maua mai lau Afioga i a tatou lafoga. Ma a silasila mai foi atunuu i fafo o lea tatou te limalima faatasi, tagiilima a tatou tupe ma manaoga mo a tatou lava atinae aua le lelei o le atunuu, o i ina le vaega e faaosofia ai foi finagalo o tatou paaga foi nei mai fafo, lea sa taua ananafi e \$107 miliona. Ia ma le tele o isi grants e aumai fafo ma grants foi nei o foai tupe e le toe totogiina. Ma amuia foi tatou o lea e faamanuia mai nei atunuu aemaise o tatou paaga. Avea foi la lenei avanoa e fai ai au ma sui o lou itumalo e molimoli atu ai le agaga faafetai i a tatou paaga, o Sapani, o Saina, o Niu Sila, Ausetalia, o Peretania, ia ma le tele o isi atunuu. E le mavae le alofa o nei atunuu, maeu foi i lo latou agalelei.

E momoli atu ai foi le faafetai i le Minisita mo Tupe Maua faapea foi lau Matagaluega, malo le onosai, malo foi le taumafai. Ia o lea lava ou te nofo ma lau saunoaga na fai i si ou uso mai le Vaimauga, ana le alu ese lava si toeaina le faipule o le Vaimauga mai lau Matagaluega e le oo i le fia miliona

le tupe na maua. Ae sa naunau lava le finagalo o le toeaina ia tele le tupe e maua. I lea lava nota, sa fai mai le saunoaga pei o le Afioga ea i le Palemia a o Minisita o Tupe, e fua le manao i le tele o le ie o le peleue. Ae ou te fai atu au, mo lenei lava paketi ma lenei Tala o le Tupe, e fua lo tatou manao fuafua i le faamai oti lea o lo o sosolo faa-afi i le lalolagi aua foi e set back uma a nei mea uma e toe tuu uma lava i tua tatou fuafuaga nei, po o le a le finagalo o le Alii ae aafia lo tatou atunuu i le faamai lenei o le vairasi 19, o le koviti -19 ea po o le vairasi 19, o lona uiga e toe alu i tua le tatou Malo. Ma le isi mea, e ese lou look forward i mo mea nei o poloaiga foi nei tate manatua ai le poloaiga a Mose a o faatali le au Isaraelu se i fai mai le poloaiga a Mose na feiloai ma le Atua. Ae le i saunoa mai le Palemia, ua leva ona kiki le matou leitio ma faalogologo atu po o le a se poloaiga aua o lea ua 16 ea poloaiga lea ua i ai nei lau Afioga i le Minisita o Aoga, o lena e luelue mai lou ao. Ia o poloaiga la na e fia faalogologo, po o le a se mea o le a talatala mai e le toeaina ma le tou Kapeneta. E momoli atu ai le agaga faafetai ma le faamalo, e le faigofie a outou faiva, e le faigofie aemaise lenei vaitau ua matua pologa a outou Afioga, ao ma le po. Ailoga e maua ni a outou moe ta te alofa atu, o matou ia e alu atu loa lava i le fale, e uma loa le TV i le po moe, ae masalo o a outou Afioga, e moemanatunatu, pei o le tamaloa foi lea, o fea ea le nuu lea e sau ai le tamaloa manatunatu. Ae o na mea uma, o le agaga o le faafetai i le Atua, o le agaga o le faamalo i lana pule faasoosoa ma lona agalelei mai ia tatou, e le o maua se isi. Talosia la, o le tuualalo a lenei itumalo, talosia, faifaimalie lo outou faiva. Manaia le fuafuaga ma le faautautaga loloto ua i ai, o le tofa saili, aua le vave faatagaina mai vaalele. A ua lava a si tatou partner lea o le Air New Zealand po o le Malo o Niu Sila, ae fai foi ma fuafua, tuu pea i ai le 14 aso e quarantine ai. Aua lava ne i tuua i ai se avanoa aua o si vala a lena. Ia manatua foi o le vaa lea na sau i le 1918, ia manatua e tasi lava pe lua nai tagata na omai i fafo ae sosolo loa le Spanish Flu tele tagata na maliliu ai. Talosia ae le oo mai lea faalavelave ia tatou. Afai ae oo mai, o le a se tatou tapenapenaga? O le manaia ia o le Matagaluega na o atu, e toa 3 le vaega na o atu, o vaega a le Malo faapea foi vaega tumaoti na o atu e faamalamalama le siama lea o le vairasi 19, ia lea fai mai Gatoloi e 19. Ia pe 20 foi lava e oo atu lava foi i lea tausaga ua 20.

A o le fuafuaga la lea e fai lau tala, o le manaia o le kilivaina mai e le Matagaluega i le malaga atu i tua i le matou nuu ma le itumalo o le faamalamalamaga o le worst case scenario ma le mea o i ai i le taimi nei. O le manaia la o le worst case scenario, a faapea ua oo mai le faamai, ia e fememeai le atunuu e panic le tele o tagata, e te i lava ua faaletonu ai le mafaufau o le isi tagata ua le iloa le mea a fai. A o le manaia o le tapenaga na o atu ma latou, na ou fesili i ai, e lelei lava le tapena o le pusa a le aiga ia po o le atopau o le mea lava e gata ai le tele, tuu i ai le ieafu, o le tagaaluga, o le napekini, o mea ia e pupuni ai foliga, le mask, le mea la e faaoga mai

e le Afioga i le Palemia. O a mea uma e tuu i totonu o le ato lea pei se emergency kit, atonu o le sao lena o le tatou Malo i o tatou aiga taitasi. O le a le mea e tupu pe afai e tasi le faleoo ae toalua ulugalii ma fanau e toa 4 e i ai? Ia tasi lena vaega. O lona uiga, e tatau ona fai se pupuni e pupuni ai le faleoo, vaelua le fale, fai se faleui tulou, e ave i ai le tagata lea o le a mai. O tapenapenaga uma ia na faamatala mai e le Matagaluega, ma ou te faafetai atu i le tapenapena ma tatou sauniuni, pe tupu mai pe le tupu mai, a o le mea sili ua tatou mao i mea lelei. O le agaga faafetai lea e avatu i le Matagaluega.

E le faaitiitia le faafetai lau Afioga Faimalo, manaia le Matagaluega o le Falemai, faafetai lava i lo outou lototetele, lototoa. E le faaitiitia foi lau faafetai ia Tuitama a o avea ai ia ma Minisita o le Falemai, leai o lau Afioga sa feagai ma le faamai o le misela. Maeu lava lo outou taumafai maeu i le Ofisa Sili o Pulega o le Matagaluega faapea foi le aufaigaluega i alii ma tamaitai fomai faapea foi le au tausimai. E le na ma se laina e faigata la outou galuega. Pei ona ou taua i lau lauga talu ai na ou sau mai le malae vaalele ou faapea, sole, pe ese ea le paneta lea ua land i ai le matou vaalele. Fai uma mask a tagata ma latou pulou, a o le puipuiga. E ese le manaia i le vaai, e mitamita ai foi lou loto, e ui o se atunuu e laitiiti ae fai mea mafai. E sao ai lava le upu lea.... O le tagata lea o Tuilaepa e vaaimamao...

FOFOGA FETALAI: Malie le sui usufono se i tuu atu le avanoa i le tulai mai a le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai, ona ua taua e le sui usufono le ufi gutu se i tulou lea ou te faia, se ua ou alofa lava i le toa 4 lea e tutu i luma i o, na auina faapitoa mai lava e le Komiti o le Puipuiga ma tuu i totonu o le faasalalauga na faasalalau atu i le atunuu atoa ia faaauau pea ona fai mea ia. Ua ou alofa lava la i si vaega lea e omai fafo, o la e usitai lelei i le faasalalauga lea na avatu e le Malo. O le ala lea ua fai ai lau ufi lea, lea e taua faapitoa, ona o tatou nei i le Maota o lea e alu atu ai le faaitaiga lelei i le tatou atunuu. Na o le faamatalaga lena leaga e le toatele matou lea e fai mea ia, ne i te i ua faapea le Maota, matua faavalevlea tele le Palemia ma le vaega lea, a o lea e taumafai e usitaia poloaiga ia e avatu e le matou Komiti i tua. Ma lou faamoemoe, ou te le o tilotilo atu i sui o le Komiti po o fai foi ni a latou ufi faapea. Ma le faamoemoe e uma mai le aumaiga foi lea i totonu ua tofu uma tatou ma mea faapea.

FOFOGA FETALAI: Malo. Ia, se i tulai mai le sui usufono mo Vaimauga Sasae.

Afioga Sulamanaia Fetaiai Tauilili Tuivasa (Vaimauga Sasae): Lau Afioga i le Fofoga Fetalai e fia tulai i sina minute e fesoasoani foi i le lauga a le, e le faalavelave lava le sui usufono lenei pe a malele le Tuiatua ae leaga o lea sa nofonofo lava ma le totoa ae te i ua pao mai le text lea mai lou itumalo ona o la e faalogologo mai ua taua le sui usufono o le Vaimauga i le lauga a le Tuiatua. E pei la o lea ua faamalamalama atu i le Maota lenei, i le taimi sa faigaluega ai le sui usufono o Vaimauga i totonu o le Matagaluega lea o Tupe Maua, e le i i ai ni system taugata sa aoina mai ai le lafoga ae sa faamalieina lava le atunuu, sa ao mai lava i le vafealoai sa o ai i tua. E pei la o le faamalamalama lena i le Tuiatua leaga o lea e tuuaina lea ua sau nei fesootaiga i luga o masini, po o le a le tuuaiga pe faapea sa i ai se mea sa faaletonu ai le auaunaga. A o lea ua ou fai atu, o le faamalamalama a le Tuiatua, o le tatou sui usufono lenei sa ea ai le Matagaluega sa ao ma le sao le lafoga, sa ao i totonu o le Matagaluega. Ae le i i ai nisi tulaga i mea taugata ia ua faaoga e ao i le taimi lenei, sa ao lava i le vafealoai. Aua foi o le Matagaluega lenei o Tupe Maua o se Matagaluega inosia, a o le lelei o le afaigaluega e o e faamalamalama ma... aua foi e le o e tufa le tupe, e o e ao. E pei la o le agaga lena leaga o lea ua faalogologo si ou itumalo ua saunoa...

Ia o sina faamalamalama lena i lau Afioga i le Fofoga Fetalai i le saunoaga a le Tuiatua.

FOFOGA FETALAI: Ia, se i tulai mai lava le Minisita mo Tupe Maua.

Afioga Hon Tialavea Fea Leniu Tionisio Hunt (Minisita mo Tupe Maua): Lau Afioga i le Fofoga Fetalai, ou te iloaina e sao le sui usufono, o le sui usufono lea o lo o i ai le isi matatia i le Matagaluega o Tupe Maua i le \$1,500,000 na ia aoina i le aso e tasi. Ia e faamalo atu i le sui usufono i le taimi sa galue ai, o la e i ai pea lea matatia. Maumau e pe ana mafai ona e toe faigaluega, ae leaga o lea ua e faipule.

Ia o le faamalamalama lea lau Afioga.

FOFOGA FETALAI: Malo faafetai. Ia o uiga la ia e tulai atu i totonu o le Maota Fono e avea ma sui usufono ae saunoa o la e mafai ona faatino ma molimauina uiga lelei sa tautua ma auauna ai i le atunuu. Ia, amuia foi Vaimauga ia o lo o faapena ona tulai mai ai se sui usufono e faapena ona saunoa ma savali ai i mea sa sau ai.

Ia tulai mai le sui usufono mo Aleipata Itupa i Lalo.

Afioga TAFUA MALUELUE TAFUA: Faafetai i lau Afioga i le Fofoga Fetalai, faafetai foi i si ou uso mai le Vaimauga le Afioga ia Sula, o lena ua aliali lou galue faamaoni ma lou tautua faamaoni i le atunuu. E le fai fua lena mea ae fesoasoani mai le agaga o le Atua e faaoloina lau Afioga. Faafetai

foi i lau Afioga i le Palemia mo le mask. Sa aumai foi si au musk ae le i faia ona ou te musu i te i ua fai sese ae ou te vaai atu i lau mask lena e fai lau Afioga, pei lava e sese le itu lena e u i ai, o le isi itu e tatau ona u i le mea lea. Ae aoga foi mea e tutupu, tasi lena mea na ou aoaoa mai i le aso lea na o atu ai le Matagaluega, o le faaaogaina o le pupuni fofoga. Na o se agaga e tuualalo atu o lea na ou faitau i le Tala o le Tupe 2014/2015, na oso i luga i le 4.3 le tamaoaiga o Samoa. O le 2015/2016, e 8.1 le maualuga o le tamaoaiga sa i ai. E mafua mai lea ona o le fonotaga foi lea sa fai nei o le taaloga a le All Blacks ma le Manu Samoa, o le fonotaga foi lea sa fai ua ou le manatua le fono, ae anyway, e i ai ma le taaloga a le Commonwealth Games sa fai, ma le fono lea a le SIDS foi ia o atunuu o le Pasefika ma Malo Aafaatasi, fetau ma le tatalaina o le kamupani ia lea sa sii ai i luga le tatou ia na ave i fafo. O le tele la ia o le tamaoaiga sa maua i vaega ia, o lea la e i ai se manatu na ona tuualalo atu i lau Afioga i le Minisita Sala Fata Pinati, manaia pe a fai se tou fesootaiga ma le Minisita o Tupe ma le Minisita... oi o lau Afioga lea e i turisi, vaega foi ia o faletalimalo. O lea ou te vaai ua tatala tatou faletalimalo fou ia e i ai pe lua ea pe tolu, o le LAVA lea e i i, o le atufalega lava lea e atu atu i Sogi, o le LAVA o le TARITA faasolo mai ma ELISA, o le AMANAKI. Afai e fesootai tatou ma lena vaega ma le vaalele, tuu i ai sina 5% pe tai 100 e totogi ai locals ma tagata mai fafo o tatou aiga e asiasi mai, pe a tatala seia maea le faamai, e tau vave mai ai ona sau tagata mai fafo e faatumu o tatou faletalimalo e maua ai foi nai a tatou seleni, e le gata i avetaxi, o pasi, o faletalimalo, o faleaiga, o mea uma faapena, o faamanuiaga eseese na, o spring offs na e maua mai pe a faapea e faatumulia tatou faletalimalo, ae mafua mai la i le fesootai o kamupani vaalele o hotels ma le tatou Matagaluega o Turisi, e fesoasoani i se isi alagatupe i le isi lumanai lea e i ai nei. Aua o le pau o le tatou tupe lea e i ai nei pei ona ou fai atu, e subject to nei mea uma, e faamoemoe i le le oo mai o le faamai. Ae talosia ia, pei ona ou fai atu, ia na o se tuualalo lena i lau Afioga.

O se manatu lautele, o lea na ou faalogo foi na lauga nisi tagata i le tatou auala lea e alu i le West Coast Road i le malae vaalele. O le manaia ia o le auala lea foi la o le a fai faapatupatu, o lona uiga e ova faapatupatu foi le mea. E ova faapatupatu le faiga o le tatou auala. O le tala a lena a turisi pe a omai, o le a le mea ua tele ai tou faapatupatu? Ae i lou talitonuga, a omai nai inisinia e fai ni nai tatou over bridges foi lea auala laupapa e oso mai i luga e le taugata tele. Ou te iloa e le taugata tele, ailoga e atoa se \$100,000 o le auala e tasi. E kolosi mai le isi itu i le isi itu. O le mea foi lena na ou talosaga ai e fa ii le taulaga, pe fai ni nai mea se 3 pe 4, e sau mai le isi itu o le ANZ e alu agai tai i le mea o lo o i ai le fale o le Malo, e gata lava i le isi ituala savavali ai lea e le toe kolosi tagata i le auala, e faapena ma luma o le fale o Molesui tuai lea e i ai le Development Bank. A i ai se isi tatou over bridge i ina, o le matua manaia lava o le tatou taulaga, kolosi lea o tagata ae flow

lava le alu o le traffic ia, e le toe tele foi ni leoleo e pologa ai. Na pau lava le mea ia mautinoa e o uma tagata i luga o le auala laupapa lea. O le mea foi la lea ou te talosaga atu ai, silasila ane tatou inisia aemaise o le tou vaega lea o le LTA pe ono feasible pe ono mafai ona fai le vaega lea mo tatou auala i le malae vaalele atoa ai ma le faasolo atu i nuu i tua faapea o lae i ai le falesa pe tolu falesa sosoo i lena ogaauala faapena ma le faleaoga, oka se alagataua ona fai lea fuafuaga. Aisea? O le laveai o soifua, e le gata o le fanau a o nai tagata matutua. E le mamao tele atu foi le tagata na malii i i Fagalii, o si tina matua ua uma le bingo ae savali faapea na afaina ai.

O le isi mea e faanoanoa ai lava lou loto, o au ou te alu lava i tua i vaiaso uma tailua taitolu aso o le vaiaso, o le matua lauleaga lava o le alu atu i Fagalii, Vaialele, Lauili, faasolosolo atu lava. Ua lelei, ua feoloolo Falefa, e pei na ou lauga muamua ai, ae faamolemole po o ai le konekarate e faia ia auala, se i outou alolofa ia. O le mea ai o talitalie mai le aufai auala ia tatou faapea se leaga lava le Palemene e valelea, tulou, o le mea moni lava lena. Sa ou talanoa foi i le CEO a le Tupe, la e la na ou vaai ua fai sina tamai stretch i luma o le faleoloa o Taito i Vaialele. Ae a alu atu le taavale i ina, toetiiti lava atoa le 15 minute e te alu atu ai i Lauili i le lauleaga o le mea, Letogo, faasolosolo atu lava faapena. E afaina uma matou nei aua matou te oso uma atu ai i tua i le auala lea.

FOFOGA FETALAI: Se i tulai mai le Minisita mo Galuega, Felauaiga ma Atinae Eeseese.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eeseese): Lau Afioga i le Fofoga Fetalai, faafetai mo le avanoa. Ina ia faasaoina se saunoaga i le mataupu lea mai se isi sui usufono, o lea ua tapena le galuega lea i le East Coast e aafia uma atu ai lava e amata atu i Vaialele seia tau lava i le mea lea e te saunoa mai ua faaletonu. Se i onosai mai lava e pasia loa le Tala o le Tupe faamigo i loa le tatou galuega lea. Ma le faaaloalo lava.

Afioga TAFUA MALUELUE TAFUA: Faafetai i lau Afioga. Ia malie foi o lea ou te fai atu o le lauga faalauaitete lea e fai atu e kava uma ai lava mea ia. O le isi mea ou te fesiligia, se o le konekarate lea na faia le auala lea i Vaivase tai, o le manaia ia o le smooth seal atoa, e pei o le alu atu i Tanugamanono i Vailima. Ae ou alu atu i le isi aso ua tutu mai masini a o timuga tetele lava toetiiti lava pei o le tele o le mea lapotopoto lea e i luma i i le tele o le mea na fai ua eli uma. Ona o atu lea o le vaega fai, ua smooth seal faalelei, timu le isi vaiaso o le mea lava e tasi. It doesn't take a rocket scientist e alu atu ma tilotilo i le mea. O le vai la e toa ai e tupu ai le faalavelave. O le a la le mea e tataua ona fai? Eli sina zone code i le autafa e pei o le togafiti lena sa faalamalama mai e le tama, zone code i fafo, ave i ai

pe 10 futu le umi eli faa 6 futu i lalo, tuu i ai ni ala tetele, faatafe i ai le vai o le mea lea ma le toa ai o le auala. Ia o le mea lena, ou te ofo lava au, o lea ua faamalamalama atu i a outou Afioga, na ala ona ave outou e sikolasipi inisinia o le mea tonu lea tou te omai e vaai, ae le o le tou omai pasi atu i o pasi ane i i, vaai le monitoring o tatou mea.

FOFOGA FETALAI: Se i tulai mai le Minisita.

Susuga Hon Papaliitele Niko Lee Hang: Lau Afioga i le Fofoga Fetalai, e faamalulu atu i le sui usufono mo le faalavelaveina o lana saunoaga matagofie. O lea foi sa lauga mai le sui usufono mo Vaimauga i le auala lea i le po anapo. O lea ua tapena le design na o le Matagaluega e fai le survey ona e sao le mau lea e tafe mai le vai i uta toa i luma i ina ona na alu atu le asiasiga e leai se alavai. O lea la ua taatia i le LTA e fai se design ma survey le galuega, ona faatino ai loa lea o le faaleleiga o le tulaga lea. Ma le faaaloalo lava.

Afioga TAFUA MALUELUE TAFUA: Faafetai lava i lau Afioga i le Minisita, malie foi lou finagalo, e leai, o le naunautaiga lava ia saogalemu le mamalu o le atunuu.

Ona ou oo mai lea i si ou itumalo, e le tele foi ni o matou manaoga. Faafetai i lau Afioga i le Minisita o lea ua talia ma le fiafia foi le feiloaiga ananafi ma le vaiaso na tea nei, sa ou talosaga atu ai i nai o matou auala e fia fai, ae o le a faailoa atu pea ona o la e faafofoga mai lou itumalo. Ia ma o le tausaga lea le palota, ina ne i te i ua faapea toeaiina, se e le o lauga mai lava le toeaina lea i tatou mea ia e fai atu ai. E motu le auala lea i gauta...

FOFOGA FETALAI: Malie le sui usufono se i tulai mai lava le sui usufono, o se mea fia faasao po o se mea fia faamalamalama? Tulai mai lava le sui usufono mo Salega Sasae.

Tofa Olo Fiti Afoa Vaai (Salega Sasae): Lau Afioga i le Fofoga Fetalai o se tamai mea lea e fia faamalamalama laititi. Faafetai. Malie lau Afioga i le sui usufono mamalu ona o lea ua e oo mai le mataupu lea, e faapena foi se lagona faanoanoa i le tulaga lea, ona e pei e foliga e leai se design e tasi foi lea e aumai e le LTA e laugatasia uma ai le faiga o auala. O lea e faalogologo atu ma le totoa lau Afioga i le Fofoga Fetalai, e pei e pule lava le konekarate ia i lana ia design. E tasi lena tupe tele e alu i le mea o design, o lona uiga o le fai lava o tanutanu o ia mea design, ia alu atu lena tupe? E pei o le tulaga lena o lea e tau faanoanoa ai foi lele, se ave le design a le tatou Matagaluega e o faatasi ai se design lelei ia mautu aua ne i toe leaga i ni mauuluu laititi foi nei.

FOFOGA FETALAI: Malie le sui usufono se i tulai mai le Minisita mo Galuega.

Susuga Hon Papaliitele Niko Lee Hang: Faafetai mo le avanoa. O lea e saunoa le sui usufono mamalu lea i design. E le pule le konekarate i le design, e fai e le LTA le design, a le sao la ona faatino, lona uiga e pau i le konekarate. A o le auala lea e laga mai e le sui usufono mamalu, o le auala ua leva, masalo po o le vaitaimi o le 1900 na fai ai le auala lea ma le malamalama foi lea o lou nei sui usufono ma le Matagaluega, po o le a le design faatoa maua atu nei lava ina ua tulai mai le vai lea e toa i luma i ina, e leai ni alavai. Ae faamalie atu i le sui usufono mamalu, e fai uma lava e le LTA designs o galuega ona pasi loa lea i le konekarate e faatino. A le faatinoina la e le konekarate lona uiga e faaletonu foi le LTA i le o e siaki ma monitor ia fai le galuega e tusa ai ma le design. Ma le faaaloalo lava.

FOFOGA FETALAI: Malo.

Tofa Olo Fiti Afoa Vaai: Lau Afioga toe tasi lava si mea lea. E mafua ona ou talanoa atu i le mataupu lea, o le auala lea e alu atu i Vaitele i le alu lea agai i uta lea e oso atu i luma o le Big Bear, afai o le design lena a le LTA, se e matua tumu lava au i le faanoanoa. A alu atu lava i le omo ua ta atu ai lava i lalo ma le omo. A silasila la lau Afioga i le tulaga la e ua i ai le auala, ua le patupatu ua le omoomo a ua patuomo. Faafetai.

FOFOGA FETALAI: Masalo e le i lavea le mataupu lea i lau saunoaga. E te le finau i le Minisita o lau faasaoga o le faamalamalama a le saunoaga a le sui usufono lea mo Aleipata Itupa i Lalo a o lea o le a e finau i le Minisita. E le mafai ona e finau faapea. Ma ia faaii maia le saunoaga a le sui usufono mo Aleipata Itupa i Lalo toe 2 ou minute ua maea lou taimi.

Afioga TAFUA MALUELUE TAFUA: Faafetai lau Afioga mo le 20 minute, ua maua lau saunoaga. E fia faailoa atu foi le konekarate lea e faia le moavao lea mai Vaipu i Aleipata e fai lava si faaletonu. Faamolemole se i silasila ane lava se tasi e monitor ina le galuega lea. O le konekarate moavao e amata mai Vaipu e tau i Aleipata. Ma le faaaloalo.

Ona ou ala atu lea i le vaega o le faafetai. Malie alii Afamasaga ua tuai ona ou faafetai atu i lau afioga ma lau Sui Lagolago, le tama ulupoo lena e i ou tua. Faafetai lava ua manaia ma manino le matou TV, ua maua uma news ma poloaiga nei a le Malo. Toaga e lau atu poloaiga pe alu atu lava i aso uma a o la e ua ola le TV matou te faalogologo ma matou matamata ai. Faafetai lava ma le faaaloalo, lau pule lea.

Na pau lava si tamai tuualalo e fia avatu, pe i ai sina avanoa e tau pau ai le tau o le tatou internet ma mea o telefoni, o la e fai sina taugata. Ou te iloa o

le Regulator o lana galuega lea, ae tatau foi ona fai sina tou input e fuafua ai le vaega lea. Ma le faaaloalo.

O le MNRE faamolemole lau Afioga i le Minisita se i silasila ifo i le togotogo lea e i le va o Malaela ma Lotopue pe ono talafeagai le toto o se isi vaega i ina e fesoasoani e le gata i le faamamaina o le sua ma le pe o le tai, ae tataa ai lava malauli ma ia tetele ou te matamata ai. E fofoa ai foi ma le anae, tulou. O le manaia ia o lena ogamea lea e i ai si toeaina o le Susuga i le Toeaina ia Malo.

O le Turisi, faafetai i lau Afioga Sala mo le faaleleia o le matou fale, o la ua faaleleia, faafetai foi i le fesoasoani mai.

E momoli atu le agaga faamalo ma le faamanuia i le Faamasino Sili, ia manuia ou faiva. E i ai lava le upu foi lele e iloga tulaga o faamasinoga i le saofaiga a nuu o Samoa. Atonu o ou faiva na, o ou mama na. Fai mai foi le upu o le Salamo e 128, Afai e le atiina ae e le Alii le fale, e galulue fua i latou o e atiina ae, ae afai e le leoleo e le Alii le aai, e mataala fua i latou i latou e leoleoina lea fale. O le mea la lea ou te faafetai atu ai i lau susuga, malo. ua matua mau le manaia o le matou fale. Avatu foi le faafetai i lau Afioga i le Minisita o Galuega, e sao lava, na ou iloa oe e te le i fanau mai, na ou faamanuia foi ia te oe e te le i fanau mai. O le malaevaalele lea i Tiavea, malo fai o le faiva, faafetai foi i le konekarate, ua lamolemole le auala, e le i alu atu le tou asiasiga ae ou te le i ai la. Ae faafetai mo mea uma, faafetai. E pau lava le mea lea na alu atu le asiasiga a matou ma le LTA ma le ofisa o galuega, ae o faapatupatu ia e i auala uma na e alu atu i gauta o Samusu, Utufaalalafa o Saleaamua, Mutiatele o Malaela o Pue ma Satitua, masalo e maualalo, e maualuga e mauaalalo tele le itu lea, toetititi lava pei o le maualuga o le kesi lele le maualuga o le faapatupatu. E i ai le taavale a si tama lea le Sui Failautusi o le Fono, e alu atu e te vaai atu e na o le malepelepe o lalo, alu atu ua paoo foi lea le taavale i patupatu. Faamolemole ailoga e alu ai se \$100, e na o se fasi sima lava e faa-smooth ai le mea, ona pau lena. Afai e i ai nisi mea, o la e faafofoga mai. O la e motu le auala i uta o Malaela, masalo e na o le 3 ni nai paipa ma sina uta maa se tasi pe 2 e tanu ai, ia manuia lena vaega. O le matou paipa lea na fai, masalo lea ua lata i le 12 masina na fai, ae le i alu atu lava se fai, e talosaga atu, ua uma ona saunoa mai lau Afioga o le a sua i le tausaga nei. Na saunoa mai foi le Ofisa Sili o le vai o Oketopa lea e i ai le faamoemoe. O nai povi lava e 10 la e i totonu o lau pa, masalo o le a tapena uma mai mo le tatalaina o la matou paipa pe a tatala. E pau na o mea o lea ou te manatu, ua ta fiu foi e tusi soo nei mea i lalo, ae a fai le lauga ua fiu e sue e le maua. O le uiga lava ia o mea, ae faafetai tele lava i le Malo. Faafetai ia outou Afioga a Minisita, afai o i ai se... oi le Minisita o Aoga, se i alofa o la o le a fai le matou faleaoga i uta, a maua sina avanoa e te asiasi atu ai, o si ou fasi fanua la ua ave e fai ai, ae a maua atu sina seleni e manaia foi, e fesoasoani ai i le faiga o le auala ma le malae lakapi la o le a fai ai. Faafetai Lautafi, faafetai Fiamē, faafetai

Tuilaepa, faafetai lava ia outou uma, manuia lenei aso. Agalelei le Atua faamanuia i lo tatou Malo. Lau Afioga i le Fofoga Fetalai, faafetai mo lou avanoa, maua lou soifua, o na e te malosi, toe sau i le isi palota, tuu lou atalii ae toe sau. Ia manuia le Fono.

FOFOGA FETALAI: Malo saunoa i lau Afioga i le Tuiatua faanofofo po o lau fetalaiga foi i le tootoo. Ia tulai mai le sui usufono sinia po o se tasi o sui matua o lea itu o le tatou Maota.

Tofa Hon LAUOFO FONOTOE NUAFESILI PIERRE LAUOFO (Anoamaa Sisifo): Faafetai i lau Afioga i le Fofoga Fetalai ua maua se avanoa o lenei itumalo. Ia e manatu o lea ua maea ona e momoli laau i Fogaa i lenei taeao, ua molitai foi le puapua i malo tumau aua ua laau o le soifua lenei taeao ae tau lau. E manatu foi ua malutiasa paia faaifo gata o Samoa o le atunuu tofi. Ua taoto i fata ae ae i lumafale, i paia faale-atunuu o paia faa-faigamalo, aemaise lava i paia ma mamalu faa-Talalelei i so o se tafa o Samoa. Afua mai i le oneone e le ufitia e le atu i sasae se i papai atu i le oneone sinasina i le atululuga. O lenei ua toe potopoto ia sui usufono, aua le filigatagaga a Samoa i lona Maota i Tiafau nei, o le malae o le faatutugatagi a Samoa. O lea la ua malumaunu le fogatia i lenei taeao fou, aua le lufilufiina o le tamaoaiga o le atunuu e ala lea i le Tala Faatatau Autu o Tupe 2020/2021.

Lau Afioga i le Fofoga Fetalai, e faamauina le faafetai a lenei itumalo, i le Tala Faatatau Autu o le tupe, aua e manatu, o se lupe na seu silasila le tuufaatasiga o lenei galuega. O se talagapasina foi saunoaga a sui mamalu ua maea ona sausaunoa. E manatu foi o le aso ma le filigaafa o le aso foi ma le mataigatila. Ona faapea lea o se taofi lau Afioga i le fofoga Fetalai, o le a oto ia tau o le moemoe, ona e tapulaa foi lou taimi. E faamauina le faafetai i le tatou Malo ona o le malupuipua pea o le atunuu mai le faamai oti o lo o aafia ai nei le lalolagi i le Koviti-19. Ae faapitoaugafa se faafetai a lenei itumalo ma lenei usugafono, i le tatou Matagaluega o le Soifua maloloina, aua tapenapenaga ua faatino faapea foi fuafuaga ua tuufaatasia, e le tatou Komiti o le NEOC, faafetai ua matauina le amanaia ma le faatauaina o tatou health workers po o le front line health workers. O i latou ia ua sauni atu e tau le taua ma le faamai lenei pe afai e sao mai ma ofi mai i totonu o le atunuu. O lo ua fuafuaina i le Tala o le tupe e pei ona matauina, se fesoasoani o le totonu e tasi le tausaga, pe afai ae aafia ai i latou i le faamai, a o faatino a latou galuega ma tiute. Lau Afioga i le Fofoga Fetalai o le Maota, e le faigofie le galuega a latou nei, aua e fai ma le iloa, e ono aafia ai foi latou. Ma e ono fano ai foi le soifua, a o le galuega e taua mo le laveaiina o soifua o isi tagata o le atunuu, pe afai ae maua i lenei faamai. O le latou lea valaauina, ofoina o latou soifua, mo le laveaina o le soifua o tagata o le atunuu pe a aafia i faamai. Ona i ai lea o se manatu e faapea, o lou lava sui

usufono, se i toe silasila lau Afioga i le Minisita o Tupe, e i ai lou taofi e le lava lea fesoasoani. A o le tuualalo ma le fautuaga, se i silasila pe mafai ona faavae se scheme i totonu o le tatou ACC e fesoasoani ai i aiga aemaise o fanau, o tatou health workers pe afai e aafia i faamai ma fano ai o latou soifua. Aua e pei ona ou fai atu e le faigofie le galuega. Faafetai foi ia latou le loto toa. O taimi faapenei e tulai mai, e manaomia e le atunuu le latou fesoasoani, ma lo latou foi tomai.

Lau Afioga i le Fofoga Fetalai, ua matauina se vaegatupe mo le faavaeina o tatou Komiti tumama. Malie foi i saunoaga a nisi o sui mamalu, sa afea lea mataupu, ua i ai seleni faaagaga mo le toe faavaeina o tatou komiti tumama i totonu o afioaga. E faapea foi se vaega seleni ua fuafuaina mo le faatuina o Nursing Community Training Centre. Atonu o le centre lea o le a aotauina ai tatou community nurses. Faafetai mo nei fuafuaga lelei uma, faafetai mo le faatauaina o le soifua maloloina o le atunuu. A maua foi se avanoa a nai sui o komiti tumama e aoina ai i latou i le centre lea, e lagolagosua ia tatou community nurses ua matua lelei lea fuafaga. E taua le fuafuaga ua faataoto mai i se vaega tupe mo le toe faaleleia o tatou district clinics. Atonu o falemai ia faaitumalo faapea foi maota o le a nonofo ai a tatou health workers ma fomai. Ia ua maua le faasalalauga o le a toe tufa i tua ia fomai i tatou falemai faaitumalo. Ia e matau atu lou sui usufono, o fuafuaga lelei uma ia tatou te tapenapena ai e tali atu i le faamai lenei pe afai ae sao mai i totonu o le atunuu. O le mea lea e momoli atu ai le faafetai i le Malo mo le faatauaina pea o le soifua maloloina lelei o le atunuu. Lau Afioga i le Fofoga fetalai, ua tele suiga taua ma le aoga ua faamasani ai le atunuu. Mafua mai i sa ma tapu a lo tatou SOE, ua matauina se faamamama avega tele i nai tagata ma aiga. Ua tele se vaega o le tamaoaiga ua faasaoina, aua foi nisi fuafuaga aoga ma le taua o aiga. E pei o le faaleleiina o maota ma le faaaogaina o nai fanau. O le fautuaga se i silasila lau Afioga i le Minisita faapea foi lo tatou malo, o a ni tulaga lelei ua matauina ae faaaauau pea pe maea le faamai. Faaauau pea pe a maea le faamai ni tulaga lelei ua matauina, mai ia tatou sa ma tapu e pei ona i ai nei. O lea lava e silafia foi e le atunuu, o lo o nofofale ia Satuiaamaa tulaga o fuafuaga e pei ona i ai lenei vaitau. E le o po malae, i aafiaga o i ai nei le tamaoaiga o le atunu aemaise lava i pisinisi laiti o pisinisi tumaoti, ma nai faletalimalo, o lea foi o lo o aumai manino i le saunoaga a le Afioga i le Minisita, i le tala o le tupe, ia aafiaga ogaoga. E pei foi ona saunoa nisi o sui usufono i le po anapo, ua silafia le mafatia o tatou faletalimalo pei ona i ai nei, ona o le leai o ni tagata tafafao maimoa mai fafo. Ona o le tapunia o le tatou malaevaalele faa-va-o-Malo, ona o puipuiga lava o le faamai, o mea taua ia. Ae faafetai o lo o maua nai fesoasoani, e pei o le totogi o le eletise ma le suavai ma nai fesoasoani faapena. A o le mea o lo o manaomia e nai faletalimalo lau Afioga i le Minisita o tupe, o lo o manaomia sina capital injection, a o lea e matauina e lou sui usufono, o lo o i ai le vaegatupe lea e tuuina au i le Faletupe o Atinae e fai mo se capital

injection, i sectors ua filifilia. Atonu o le a aofia ai ma faletalimalo i na fuafuaga taua ma le aoga. E faamalo atu ai, i lea foi tofa ua ae, i fesoasoani faapena. Faafetai o lo o maua foi fesoasoani i nisi o faletalimalo e pei ona saunoa foi se tasi o sui usufono anapo, i latou o lo o malaga mai i malaga faapitoa o tatou vaalele ua taunuu mai. O lo o faapena ona quarantine ai i latou i nei faletalimalo, maua foi sia fesoasoani. Faamalo faafetai. Ua maua foi se faamalosiau i nai faletalimalo o pisinisi, o ituaiga pisinisi uma lava, i saunoaga ma le faaaliga a le Palemia o lo o faia nei ni feutagaiga ma le Malo o Niu Sila, e toe silasila i se auala pe mafai ai ona toe tatala ia feaoaiga i le va o atunuu e lua. Aemaise o lea ua faamauina e leai lava se isi o aafia i le faamai, aemaise lava tatou i Samoa nei. Ae fai uma na fuafuaga i luga o fautuaga a i latou o lo o tomai faapitoa i le faamai ma le tatou komiti o le NEOC, a mafai na tatou ausia lea tulaga faapea, faapea foi feoaiga i le va ma o tatou uso tuaoi o Amerika Samoa, o le a tele se fesoasoani, e le gata i faletalimalo ae faapea foi ia faleoloa ma nai faleaiga, faapea foi taavale laupasese ma isi ituaiga pisinisi uma i totonu o le atunuu. Ona tulai mai lea se tulaga o le toe lalagaina o le tamaoiga o le atunuu. E talitonu o na fuafuaga uma, o le a faamoemoe ma faalagolago i fautuaga a le soifua maloloina, faapea foi i latou o lo o fautuaina lo tatou Malo i tulaga o le faamai e pei ona i ai. Lau Afioga i le Fofoga Fetalai, e taua tele, i lou nei sui usufono le tatou vaalele, ua i ai foi isi Fonotaga ua tuanai, sa lauga lava lenei sui usufono, i le taua o le i ai o se tatou vaalele. E faafetaia ai le Minisita e faafetai foi i sui o le Pulega sa o latou malaga atu i fafo ma fai feutagaiga ma le kamupani lea i Norway e aumai ai le tatou vaa lea o le a aumai o le isi 737 800. E maua foi i le lipoti o le vaa e na o le 5 tausaga, o lona uiga e fou le vaa. E le i taitai le life o le tatou vaa lea ua fuafua e aumai. Afai e US\$245,000 le totogi i le masina i le lisiina mai o le vaa lea, ou te talitonu o se tau pau ma le taugofie, a fuafua i le totogi o lisi o isi vaa ia sa tatou faaaogaina muamua ma ua toe faafoi atu. O lenei lava vaitau e pei ona silafia ma maimoa i luga o le Televisi ma upega tafailagi, ua tele kamupani vaalele o le lalolagi ua gaumativa bankrupt. Ma ua faitau afe vaalele ua tutu ua le o toe feoi. O lona uiga afai e lelei ona faafoefoe ma pulea lelei le tatou kamupani vaalele, atonu lava o le a mafai foi ona toe lisiina mai se isi vaalele taugofie pe sili atu ona taugofie le tatou vaa lea ua fuafua e aumai i le masina o Aokuso pe afai e talafegai ai.

Lau Afioga i le Fofoga Fetalai, i se vaaiga i le lipoti faale-tausaga a le kamupani Polenisia Samoa air lea ua i luga o le laulau a Fono, ma ua maea foi ona iloiloa e le Komiti, o lo o faataatia mai ai tupe pau e \$24 miliona. Tupe pau tauave e \$40 miliona, a tuufaatasi ona i ai lea o tupe pau faaputupu e \$64 miliona. O lo o i ai foi se fuafuga e pei ona maua i se lipoti a tatou kamupani mo le nonoina mai o se isi \$30 miliona mai le UTOS, au operations o le tatou vaa lea e fuafua e aumai nei. O fuafuaga taua ma fuafuaga lelei, o lo o maua foi i le Tala o le tupe se \$5 miliona o le a tuuina

atu i le tatou kamupani valele, o se vaega o se tau, compensation mo le faaaogaina e le Malo o le malaevaalele i Fagalii mo isi fuafuaga taua a lo tatou Malo. Lau Afioga i le Minisita o Tupe ma le Minisita o le tatou Kamupani vaalele, o lena e i ina le tofa, o lena e i ina le tofa e fuafua lelei ai le faafoefoeina o le tatou kamupani. Ae silasila o matou lava fautuaga, ia ae se i silasila i le tulaga o i ai mafuaaga ma fuainumera o lo o faavae ai a tatou revenue forecast mo le agai atu i luma, ina ia mautinoa e gafatia ona totogi a tatou nonogatupe ia a le tatou kamupani, ina ia faaauau ai pea lenei foi auaunaga taua mo tatou ma le tatou atunuu, o lo o faamoemoe foi i ai lo tatou tamaoaiga. Ua saunoa le Afioga i le Palemia i le faamoemoe e pei ona i ai le malaevaalele i Tiavea i Aleipata. O le faamoemoe e avea ma Regional Airport, po o se malae vaalele faaitulagi. O le fuafuaga vaai mamao mo le atinaeina o le tatou Tourism Industry, malo faafetai. Ae o le tulaga e pei ona matauina lau Afioga, o lo o solosolo lelei, o le matou lava fautuaga, ia taumafai e faamaea le tatou galuega lea, ae le i maea lenei Paeaiga. Ma tatalaina mo le faaaogaina, e maua mai ai foi se isi vaega tupe a lo tatou atunuu.

Lau Afioga i le Minisita o malaevaalele ma atinae tetele, o le matou lava fautuaga, se i silasila ane i le tatou auala lea o le East coast road, a maea le tatou malaevaalele lea faaitulagi i Tiavea, e manaia foi ae toe fausia le tatou auala lea agai i Tiavea, le malaevaalele lea, i se tulaga lelei, upgrade e pei foi o le auala lea o le west coast road, o lea e agai atu i le malaevaalele faava-o-Malo i Faleolo, ina ia faapena foi ona faaleleia le auala lea, le tatou east coast mo le tatou malaevaalele fou lea i Tiavea.

O s emanatu e faataatia atu i autafa o lau afioga i le Minisita e silasila i ai ma liuliu i ai le tofa ma le faautaga. E faamanatu atu i lau Afioga i le Minisita nai auala galuega a lenei itumalo. E le tele lava, pe 2 pe 3 nai auala galue ia sa talosagaina. Aemaise lava le auala lea sa asiasi foi i ai lau Afioga, e agai i uta i Solosolo. O le auala lea ua nofoia e aiga, ua aina atoa le agai i uta. Ma ou te talitonu foi, e le tatau ona toe taua o se auala galue lea auala. Aua o le nuu atoa la ua i uta, se i silasila i ai e 4 ekalesia tetele ma ua alu ai foi le bus service. Ua faaletonu lava le auala lea, le auala lea e tatalo atu ai i lau afioga, se i toe silasila ane i ai i le tulaga lena. Ae faafetai mo le galuega lea ua faatino i le auala agai atu i Sauniatu, malo faafetai, e le faigofie e le taugofie foi ia galuega. Ae faamalo i le galuega lea i lau Afioga i le Minisita. E faamanatu atu foi i lau Afioga i le Minisita o le Siosiomaga, nai taligalu, e na o le 2 lava afioaga o lenei itumalo lea sa talosaga atu ai, i nai taligalu. O lea e matauina i totonu o le Tala o le tupe, o lo o faataoto mai se vaega tupe e \$15 miliona mo taligalu faapea foi ma polokalame e tali atu ai i aafiaga o le tau. O le mea lea e toe faamanatu atu, se i toe silasila ane lau Afioga i lea vaega.

Lau Afioga i le Minisita o tupe, toe foi mai lau tala, pe sese lau vaai, ae pei e foliga mai e le o afea e lau faasoa i le Tala o le tupe nai vaega o kamupani

ma fale gaosioloa, manufacturing sector, e talitonu o lea e lavea i isi fesoasoani ia e faasafua i pisinisi. A o se fesoasoani mo le vaega lea, e pei e foliga mai i lau vaai, e le i afea i lau faasoa. Se i toe silasila ane pe sao lau matau, ae taua le vaega lea i lou talitonuga, ona o le tulaga i import substitution. E fesoasoani foi i le tuutiitia o le faaogaina o tatou foreign reserves. O lo o manaomia i lenei vaitau, aua o lea tatou te i le vaitau le mautinoa uncertainty, ona o le tulaga o le faamai e pei ona i ai. se i silasila ane lau Afioga i nai talosaga na, aua e taua uma ia vaega. Lau Afioga i le Minisita o le Ava malosi, ua 3 tausaga pe 4 tausaga o iloilo lava e lenei Komiti faa-Palemene lipoti a lau Matagaluega ma avatu ai fautuaga i fagu malosi ia, o le olioli, ma isi fagu malosi. O lea foi sa tatou feiloai, faafetai i le afio atu o lau Afioga ma le pulega i le matou Komiti, o ai na manatu o le a sii atu le fala siigata. Faafetai sa tatou feiloai fiafia ma le tulaga ua tatala atu foi molimau ma mau, o lena ua e silafia ia vaega uma. E pau lava o lea ua ou taua ai lea vaega ma ou afea ai le itu lea. O lau Tulafono Tau Faaofi foi lea o le ava malosi, o lea lava e faatali le Komiti i sou finagalo. O lea sa e tatalo atu e faataatia, o lea lava la e taatia. O le Tulafono lea o lea ou te vaai atu e taua ma aoga, e fofu ai nisi pe tuu itiitia ai nisi o faafitauli o tulai mai i le ava malosi. Se i toe tagai ane lau Afioga mo sou finagalo i se taimi, ona logo mai lea o le matou Komiti. Afai foi o tele nisi fuafuaga ma tapenaga o fai, ia o le fautuaga, aumai se lafo e toe faau i tua lau Tulafono, e toe tapena faalelei mai. O fautuaga e faapena, ae o lea o le a faatali atu pea le matou Komiti i sou finagalo. Lau Afioga i le Fofoga Fetalai, o au le isi tagata e lavea i le lio foi lea o le afaipisinisi laiti. O pisinisi laiti e taumafai e faamalie ia manaoga o Tulafono a le Malo ma mea uma.

E suetusi, tausitisi, suetusi, tausaga uma tausaga uma, ona e manaomia foi lea mo le vaega o le tologiina o lafoga e fua i ai lafoga e tologi. E manaomia e faletupe aua o la e i ai nonogatupe, e fai mai e aumai financial statement. O lenei lava galuega o tausaga uma, o lau Afioga o le isi foi fai pisinisi o le atunuu. E fai i tausaga uma tausaga uma, o le taugata ia o pili o nei suetusi, ioe, ae fai i tausaga uma tausaga uma. A o le mea e fai, e le tuua e manaomia i le Tulafono. E oo foi la i pili a inisia, o le matua taugata, o le taugata o pili a inisia. E maua le lipoti i le pili a le inisia lea e faia le falesa lea e i Lepea e matautia, pe afai e sao lea lipoti na ou maua, o le taugata. O pili a konesale, o lea na e nofo mai le Afioga a le Minisita o Tupe sa galue faakonesale i le tele o tausaga, e fai lava sina taugata o pili a konesale. O la foi e taumafai nai atinae laiti, ae fai mai le PUMA e manaomia se lipoti lea e tau o le EIA Environment Impact Assessment, alu e sue se konesale o siosiomaga e fai mai le lipoti, ona fai atu ai lea o le pemita e fai ai lau atinae, se tamai atinae lava. Saili, saili, saili, maua le tamai konesale e le i leva ona iu mai, ou fai atu e fia lau pili, ae fai mai e \$20,000. Ou fai atu ia.... a o le pili pitosili ona taugofie lea, e le mafai ona alo ese leaga o la e manaomia e le PUMA. E usitai fai le mea lena e fai mai ai le Malo e fai, o le matua

taugata o pili. A o loia, e leai se mea o le a alu ai fua e vaai se loia vagana ua molia oe i le Tulafono, vagana ua molia oe i le Tulafono ona o lou amioleaga, ona e alu lea e vaai le loia. Ae le faapea e te nofo nofo, pe te alu i tausaga uma e vaai se loia. Vagana foi ua faaletonu nai au gaioiga i le palota lea e lumanai nei, ona molia lea o oe e le isi sui tauva, ona e alu lea e vaai se loia. Ia e faa-tasi la i le 5 tausaga. O le tulaga lena, e manatu foi i loia ia, e le taugata ni pili a loia. E tupu ae lou alofa ananafi i lou faalogologo atu i saunoaga a nisi o sui usufono, i mea ia o vaegatama, fai mai taugata, e \$1,500 lea na tau \$2,000 lea na tau. E le faigofie, e le faigofie. Se i faauma atu lava le vaega lea ona atoa lea o le aumaiga o le mataupu lea e aumai. O lea e matau atu....

Afioga Alaiasa Muagututia Moefaauouo Malagaitutogiaia Sepulona Moananu (Anoamaa Sasae): O se mea e fia faamalamalama, i le saunoaga a le sui usufono, atonu o le a maua ai se fesoasoni mo matou. O lea ua...

FOFOGA FETALAI: Silafia foi e le sui usufono.... tulai mai le sui usufono mo Anoamaa, e tasi foi lea suetusi.

Afioga Alaiasa Muagututia Moefaauouo Malagaitutogiaia Sepulona Moananu: E ese o le manaia o le saunoaga a le sui usufono, o lea ua aafia uma lava professionals foi i lana saunoaga. Ae na amata lava i suetusi. Ou te fia iloa po o ai le suetusi taugata lea e faia ia tusi ia, ae ou te ofa atu.... ou te taugofie atu pe ana ou tago e fai ia ana tusi. Ou te manatua lava le tala a le isi inisinia na avatu i ai le taavale e fai, na ona tago atu lava o le inisinia ta i le spanner toe ola le taavale, ae fai mai e \$1,000 lau pili. Ae vaai mai le inisinia e \$1 le tau o le spanner ae 999 lou faiai lea na faaaoga e fai ai le... e pei e faapena. Leaga o auunaga, e le momoe lelei ai foi tagata, e pei foi la o suetusi. E i ai foi isi taimi pe te i ua faapea mai le sui, toe tuu atu le isi vaega lea i i se i faalaititi ifo lau lafoga, ae fai atu le suetusi, e le mafai ona fai se mea faapena. Ia ma le agaga faaaloalo, ia manuia le tatou Fono.

Tofa Hon LAUOFO FONOTOE NUA FESILI PIERRE LAUOFO: Lau Afioga i le Fofoga Fetalai o ituaiga suetusi ia e le manaomia, aua o le a faasolitulafono la.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi: Lau Afioga i le Fofoga Fetalai...

FOFOGA FETALAI: Tulai mai le Palemia o le isi foi suetusi.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O le mea o le suetusi e taugata, e tatau ona taugata leaga o outou lea e faafeagai ma pisinisi. O lona uiga la, ua tatau ai le maualuga o outou pili, leaga o lea foi e fai i isi pisinisi e tele tupe. Ae sao ai la le faitio lea e fai mai i le tele o pili a loia, leaga o loia ia e faafeagai ma le tele o le ausolitulafono e leai ia ni a latou tupe.

Ia lau Afioga i le Fofoga Fetalai e faigofie lava. E ala la ona fai atu e tuu tuu i lalo pili a loia, ona o lea e faafeagai ma tagata e leai ni tupe. E faapena foi fomai, ae o outou nei o suetusi, ia fai fuafua foi a vaai atu ua tele le pisinisi, tuu i luga ia outou pili ae a vaai atu ua tau pe, tuu i lalo.

FOFOGA FETALAI: Ae o le taunuuga o na mea ia se se i fai ma se alofa. Ia e pei o le taunuuga lena o le Tusi Paia, o le fai ma se... ia se i tulai mai foi ia le la suetusi. Malie lau Afioga i le sui usufono mamalu o Anoamaa i Sasae...

Tofa Hon LAUOFO FONOTOE NUA FESILI PIERRE LAUOFO: Lau Afioga i le Fofoga Fetalai leai o lea o le a maua se fesoasoani i afioga i sui usufono mamalu o le ausuetusi.

FOFOGA FETALAI: Tulai maia le sui usufono o Gagaifomauga Nu.3.

Afioga Faaulusau Rosa Duffy Stowers (Gagaifomauga Nu.3): Leai o lea ou tulai atu e le o au o se suetusi, ae o lou tulai atu ona o le saunoaga a le Afioga i le sui usufono mamalu i le vaega lea o inisinia, ona o lea e faapea e taua ai le galuega o le falesa lea i Lepea e le o alala mai le Taitaifono o le Komiti, ae e na ona fia faailoa pea e faasaoina e leai e le o totoigiina le inisinia lea e feagai ma le galuega lea o le falesa i i i le itu lea.

O le uiga la o le faamatalaga, ia aua e i ai lava isi profession e mafai ona faatino ia le latou galuega, ia ae faamoemoe i le Atua e totoigia. I le ava ma le faaaloalo tele.

FOFOGA FETALAI: Ia malo faafetai, ia se i tulai mai le sui usufono le matua i lau Afioga Fonotoe.

Tofa Hon LAUOFO FONOTOE NUA FESILI PIERRE LAUOFO: Faafetai i lau Afioga i le Fofoga Fetalai, ia o le tulaga lea e sao lelei le saunoaga a le Afioga i le Palemia. O le mafuaaga na o lea ua ou sau ai i le Maota. Ua ta fiu e ta te alu e fai ia nei ausolitulafono foi ia, e avatu pili e leai ni tupe. E na o le gau, gau, ae e pei e manaia i, e maua si totoigi e tai 2 vaiaso ma maua si totoigi si sisipeni a. Ia e pei o le tulaga lena, ae o le auvaega foi ia suetusi, e i ai foi le taimi e omai ai ia matou. Ia ou fai atu, tapena lelei aua

utā. Ae o le mea lea, sue lelei a tatou tusi. Te i ua maua se suetusi, ia ona toe iu mai lava lea i luma o le loia.

O le mea lea lau Afioga i le Fofoga Fetalai, e faaiu atu se matou faamatalaga. E pei ona ou fai atu, se o au lea na tupu ae lou alofa i sui usufono ia na sausaunoa anapo i le tofogi mo mea ia o vaegatama, \$1,500, \$2,000. Ona ou nofo lava lea ma ou mafaufau ma ou faapea, se e le tau aumaia i luma o le Maota nei mea. O mea faigofie, mo mea faigofie mea ia. E talatalanoa ifo lava ia au i fafo i o a, ia ona ou fai atu lea, aumai ou te faia. Aumai uma o e lau mai tamaiti, fai fua e leai se tofogi. O lau lena fesoasoani i ai. Ae aua le... e gasea e tau sausaunoa i luma o le Maota i nei mea. O mea faigofie.

Ia lau Afioga i le Fofoga Fetalai, agalelei le Atua i lou soifua. Ioe, ia faafualoaina pea lou soifua, maua le malosi o le tino ae faasilisili le agaga. Ioe, alofagia e le Atua le Afioga i le Palemia ma le Kapeneta ia ma le la Itu o le Maota, ia faapea foi lenei Itu o le malu, Afioga i Taitai Komiti ma Sui Taitai Komiti, ia faapea foi sui usufono mamalu o lo o afifio atu i lenei itu o le Maota. Ia o le tatou Ofisa o le Fono, ia faamanuia foi le Atua i Ofisa Sili o Pulega o Matagaluega, ma Faalapotopotoga Tumaoti.

Ia lo tatou itumalo, ia e le i taitai se taimi. Tatou feiloai pea, alofagia e le Atua le tapuaiga a lou itumalo ae folau lagima le tapuaiga a Samoa, soifua manuia le Fono.

FOFOGA FETALAI: Malo, faafetai. Ia ua malo saunoa i lau Afioga a le matua Lauofo, le fetalaiga ia Fonotoe, sui o Anoamaa i Sisifo. Ia tulai mai Aiga i le Tai, ia o lou avanoa lenei.

Susuga MULIPOLA LEIATAUA LAKI (Aiga i le Tai): Faafetai i lau Afioga i le Fofoga Fetalai, ua maua se avanoa o lenei itumalo. E taliga foi e fialogo le mauga o Matautia i lenei taeao, ia ae o se matagi e agi fisaga foi saunoaga e pei ona pau i le Maota.

E manatu o lea ua maea ona e logo le lagi, tatala foi le tau ma tapa tulia le tata i lenei taeao, ia aua foi le soifua ua sopo, pau o le Maota, afio o lau Afioga i le Taitai, faapea foi le mamalu o le Kapeneta. Ia afio o lau Afioga i le Fofoga Fetalai ma le mamalu o lenei Palemene. Ia tainane foi le afifio o Ofisa Sili o Pulega o Matagaluega aemaise foi o Faalapotopotoga Tumaoti o lo tatou Malo. O tupu ma ee, o e o fitaituga e tautuaina ia lo tatou Malo, ia malo le soifua manuia faamalo foi le lagi e mama i lenei taeao.

E manatu e le toe solia le ogasami ua uma ona fagotaina, lea ua maea paepaeulufanua lo tatou taeao, o paia faale-Ekalesia, o paia faale-Malo, o paia faale-atunuu, ia foi le viiga i le Atua, o le Atua na ia tausii ma taitaitama lo outou soifua ma so matou ola, ia o tatou feiloai i magafetau soifua i lenei taeao.

O le tulai o le sui usufono ma le agaga faaaloalo i lenei taeao lau Afioga i le Fofoga Fetalai, ia ua na o ni nai motugaafa foi aua ia lo tatou sa fautele i lenei taeao. Ua 3 nei o aso o talanoaina ia le tatou Tala o le Tupe, le tatou Tala o le Tupe Faalopoopo Nu.3 2019/2020, ia aemaise foi le tatou Tala o le Tupe Autu ia 2020/2021.

E momoli le agaga faafetai tele, i lau Afioga i le Minisita ma le paia o le Matagaluega, ia aemaise foi Ofisa Sili o Pulega o Matagaluega uma ia aua e tofu sao ia aua le tatou Tala o le Tupe. E ui la ina utiuti ia le tatou faasoaa, e le tau talatalaina nei vaega, ia peitai o lea lava ua o tatou molimauina i lenei vaiatau.

E ui i le faigata ua lofia ai le lalolagi ona o le faamai o le Koviti, i aafiaga foi ua aafia ai si o tatou atunuu, peitai o lo o molimauina pea le agalelei o le Atua i lana pule faasoasoa, ua au lava lau faasoaa i so o se vaega, mo le tatou atunuu. E leai se lagona e tupu ae se tofa faapea, ia peitai, o lea e tatou te mativa faafesagai. O a mea ua foai e le Atua i aao o lo tatou Malo e tauala mai i a tatou paaga mai i fafo, ia aemaise foi o tatou galuega faatino i totonu o lo tatou atunuu, ia o lea ua fai i ai ia le tatou polo faasoaa. Faamalo faafetai, tuuina atu ma le atoatoa le lagolago a le Aiga i le Tai e ala i le tatou Tala o le Tupe e pei ona folasia i lumamea.

O si vaega laitiiti e fia oo i ai se faamatalaga i le vaega o i ai faamanuiaga i le tulaga o a tatou Komiti. O le tasi lenei o vaega o lo o tu malosia aua le atinaeina o lo tatou atunuu. E lagolagosua i le pule mamalu a alii ma faipule, aua le manuia o nuu ma afioaga, Ekalesia, aemaise ia lo tatou atunuu. Peitai o nai vaega laiti e matauina e le o mafai ai ona oooo atu lenei faasoaa i nisi o Komiti, ia ona o le tulaga o noatia ai i vaega foi ia o nuu e faapea e le o ni nuu mavae, ia aafia ai foi nuu o lenei itumalo. E pei lava foi ona tau faamatala i le tele o taimi, ia o Manono lava ia, e manino o le taatiaga o nuu mavae, e pei ona i ai tai o lo tatou motu.

I tai lava ia i le suiga o le tau ma le aga ifo o le nuu i uta, ia ua faaluaina pe faatoluina le faitau aofai o lo o i tai o le motu. Ae e oo mai i le taimi nei, ia e le o mafai ona faamanuiaina ia Manono i vaega faapea tau Komiti a Tina, ona e le o mafai ona taua o se nuu mavae i latou o lo o aumau ma nonofo i se vaega o nonofo i Upolu faafesagai ma lo tatou motu. Ia o vaega la lea e le mafai ona oo i ai le faasoaa i le tulaga lea i faamanuiaga faasafua mo Komiti o Tina, ia e manatu e fitoitonu i le Minisita o Tina ma Tamaitai ia le vaega lea. Ia e tatalo atu ai i lau Afioga i le Minisita, ia faasoaa foi ma fetufaai, se i alofa ane i le vaega lea i se faiga e faasopolia ia faamanuiaga.

Afioga Hon Tuitama Talalelei Tuitama (Minisita mo Tina ma Tamaitai, Atinae o Nuu ma Afioaga ma Agafesootai): Lau Afioga i le Fofoga Fetalai...

FOFOGA FETALAI: Malie le sui usufono o Aiga i le Tai, se i tulai mai ia le Minisita o Tina ma Tamaitai.

Afioga Hon Tuitama Talalelei Tuitama: Ia e le fou le mataupu lea lau Afioga i le Matagaluega. O le tasi foi lea o faafitauli o lo o nafa pea ma lenei Matagaluega e taumafai e saili se auala ina ia faafeagai ia ma vaega nei o lo tatou atunuu, e le o i totonu o nuu mavae. Talu ai ona o le Tulafono, o lo o limataitaiina ai lenei Matagaluega, e faasino tonu lava i Komiti o Tina i nuu mavae. Ia o tulaga lava la o tofiga o lo o aumai i le Tulafono, ia e tofi lava e Komiti a Tina, ia le Sui Tamaitai o Tina o le nuu, ona ave lea e faamamalu e alii ma faipule, ia ona aumai ai lea o le maliega o le afioaga, o le latou Sui Tamaitai lea o le Nuu, ia ma ave i le Kapeneta e faamaonia mai ai ia lea faamoemoe.

O le taimi nei, o le vaega lea e saunoa i ai le sui usufono mamalu, o lea foi ua fai sina levaleva ona faatalanoa e le Matagaluega, tilotilo i ai i se auala, e aofia mai ai ma i latou nei, tina ia o lo o i totonu o afioaga, lea e tai pei o itumalo faale-taulaga, ia ma settlements foi ia e tai pei o Vaitele, Vailima. Ia o vaega faapena o le atunuu, o lo o i ai le toatele o tina e le o mafai ona faamaopoopo mai, ina ia maua uma ia faamanuiaga lea o lo o faasafua atu, ia mo isi tina o le atunuu.

O lea la, ia e fautua atu na ona... e sao lelei lea e saunoa ai le sui usufono, ia ae lava papale mai, o lea ua amata ona agai le Matagaluega e faatalatalanoa ia le mataupu lea. Ia ae afai ae alu alu sau se taimi maua ai se tonu mautu, ia po o se auala talafeagai e faatino ai lea faamoemoe, ia ona tuu atu foi lea i le Kapeneta, mo sana faaiuga e faatino ai se faamoemoe faapea. Ae o le agaga lea ua leva ona silafia e le Matagaluegale tulaga lea, ia ma o lea ua amata ona galulue i ai, ina ia faatino le faamoemoe lea ia aua ne i i ai se tina e le pei o upu foi ia e masani o lo o tatou gagana ai i lenei vaitaimi, so no woman or no mother is left behind, a ia taumafai e aofia uma mai i totonu o le lio, o fuafuaga fai a le tatou Malo ia aua lumanai manuia o tina uma o Samoa, ae e le na o se vaega o tina. Ia o le fesoasoani atu lea e pei ona saunoa le sui usufono.

FOFOGA FETALAI: Malo.

Susuga MULIPOLA LEIATAUA LAKI: Faafetai, faafetai i lau Afioga i le Minisita. E tasi nei o Minisita e saunoa loa e uma lota popole. O se tasi foi o Minisita matua o le Maota, e faamaoni i ana saunoaga. Faafetai mo le faatofalaiga i lau Afioga. Ia ua maua foi se lagona i lenei taeao, e ala i le faasoa a lau Afioga, ia o le a see ese foi ma le vaega lea, ia o lea o le a logo le Komiti, ia e toaaga pea e asi mai ma ia faigofie ai ia a tatou mea e fai.

E le i itiiti le agaga faafetai i lau Afioga ma le Matagaluega, i le tele o tatou Polokalame faagasolo, e taalogologo foi ia o tatou nuu ma afioaga, ia aua

foi le faatinoina o le tele o polokalame, aemaise lava le tulaga i le tatou fuafuaga lea e pei ona i ai tulaga ia o tatou taiala o itumalo.

E matauina nisi o poloketi e mafai ona tali i ai, peitai ia ua vaeseuga foi ua le toe maua nisi o tatou fesoasoani ia aua lava le faagaioiga o nai atinae ua tuu atu i totonu o le tatou taiala, ia e tau o faatasi foi ma le tulaga o tatou SIM Plan e pei ona tapena e le MNRE. E tele le fesoasoani o lea vaega e pei ona tapena ai lau Afioga ma le Matagaluega. Ia o le tatalo lava o le tatou mulumulu aufoe, tataou oloolo pitovaa, ia maua foi manatu aua le fausiaina o lo tatou Malo.

Ia ona ou oo mai lea i le Vaega o Galuega, e momoli le agaga faafetai, lau Afioga i le Minisita o Galuega, e matuina lava ma le totoa, tulaga i le utiuti o lau faasoa. Ia aua a oo ina laulausasa mai faiva o lo tatou Maota, ia e leai lava se vaega e le afea ai lau Afioga. Peitai ua matauina nai nisi atinae, e pei ona faatino i si ou itumalo, ia e faafetai e tauala atu i lau Afioga, le Tamaitai Pule ma le Pulega o le Suavai ia ua faamalieina ia si o matou motu i Manono tai. O se taimi muamua lenei ua faasopolia ai ia le tulaga o le suavai taumafa, o le suavai lea ua ova ma le 10 tausaga ua maua se suavai i le motu. Ia ua le gata ua suia ia le paipa lelei lea ua alu atu i le taimi lenei, ia ua mafai foi ona faasopolia le motu. Ia faafetai mo le auaunaga, ia aua e le tau fesiligia le vai, ia o le ola o le tagata soifua, ia o lea ua fiafia lava ia si o matou motu. E le gata i si o matou motu i tai, ia ma si o matou nuu i uta, ia ua maea foi ona sua le vai faataamilo, ia faafetai i le auaunaga. Faamalo le galulue, ia ae o le tatalo masani lava, ia fai ma alolofa ane i nisi aiga i taimi i tulaga e fai si umi o le tatou process foi lea o le sueina o nai vai fou, ia aua ua uma foi ona faataatia ia nai laina ia, ia ae o le umi ia o le tau, toetiiti lava leai se tagata e sulu mai i le process lea ona e fai si umi ona tau faataamilo e pei o le lesitala muamua i le amataga, toe omai e totogi le \$200 o le connection fee ia ma toe tau tulituli foi le taimi e faaola ai. Ia faafetai o nisi o taimi e valaau atu ma tali mai le Matagaluega oi ia le Faalapotopotoga.

Ia e momoli foi le agaga faafetai i lau Afioga i le Minisita, e tauala atu i lau Afioga le LTA ma lo matou auala ia o la ua toetiiti maea le auala o si ou Kolisi o Aana Nu.2. i le nuu o Apolima, ia faamalo, ave o le faamuamua ia aua ia tulaga i a tatou aoaoga. Ia e tasi lenei o auala ua ova ma le... ou te iloa Talu ona faavae mai le aoga lea, o se taimi muamua lea ua sua ai ma lelei le tulaga o le faata tau faasauni atu masalo o le masina fou e mafai ona faamaea ia lenei galuega. E momoli le agaga faafetai i lau Afioga ia ona o tulaga maualuga ua mafai ona tali le faaaloalo i nisi o galuega.

E na o ni nai fautuaga laiti lau Afioga i tulaga o auala galue i si ou itumalo. E pei o le tasi lenei o itumalo e fai lava si tele i lo tatou saofaiga, ona o le tulaga e pau lenei o le itumalo e le i vaeluaina talu ona faavae mai, o le itumalo mavae. Peitai o lea ua faaopopo ma Satuimalufilufi, ia ua atili ona faateleina ia le itumalo, fai si tele o auala galue i si ou nuu o Lalovi ia faapea foi ma Satuimalufilufi. Ia e moomia foi le faaleleia o auala galue ia o lo o

agai i le Primary School lea i Satuimalufilufi ona e tau fai si maotua ma le auala. Ia ae ua nofoia atoa ia lea vaipanoa e pei ona molimauina i le aso na tatala ai le faleaoga fou lea, ia ua aai faasoloatoa lea vaega, pe a moomia se faaleleia o lea auala. Ia faatasi ai ma nai ou nuu o Apolima, Faleu, Salua ma Lepuiai, ia e tofu uma lava nai nuu ia ma auala galue.

FOFOGA FETALAI: Toe lua minute o le sui usufono.

Susuga MULIPOLA LEIATAUA LAKI: Faafetai i lau Afioga, e alu lava i le ia a le tautai o le faalolo, e pule lau Afioga i le Nofoa.

Ia na ou oo mai lea i le tulaga i le Esetete Tausi, lau Afioga i le Minisita, ia e momoli le agaga faafetai i le tele o galuega faatino a le Esetete Tausi, ia o lo o mafai ona manuia ai tagata o leni itumalo, e ala i a taou galuega faatino.

2016 faatoa tulai mai ia... tusi atu le Afioga i le Minisita sa i ai ma le Pulega, ina ia aveesea i latou o galulue faasolitulafono, faaaogaina o nei eleele. Ia sa tautalagia lava si ou nuu ma mafai ona taofia e oo mai i le taimi nei, peitai o lo o matauina, ia o lo o galueina lava e isi nuu ma isi afioaga. Ia sa ou faapea o le a vave ona tali atu ai le Afioga i le Minisita i talosaga a leni nuu i eleele, se i galulue ai, ia o le nuu lea e taunuu ai le upu lea e lumafale i moana ae tuafale i le papa. E leai se mea e galulue ai o le tele foi o le vaega e nonofo ai le itumalo leni ia e faataufusia atoa lava vaeane le pau o le Maota. Ae o le tatalo lea e pei ona taatia atu o lea ua 5 nei tausaga o le... 6 tausaga i le talosaga lea, se i alofa ane i nai eleele se i galulue ai le Aiga i le Tai.

FOFOGA FETALAI: Ia malie le sui usufono o lo o i ai le faauilavea tulai mai le Minisita o le Esetete.

Afioga Sala Fata Pinati (Minisita mo le Esetete Tausi): Faafetai lava i le sui usufono o le Aiga i le Tai. Ia malo uso ia le taulagalaga i mea lelei. O le tulaga i mea ia tau eleele o le Esetete, ia mo le silafia foi o eleele ia e tau o le Malo, e aafia uma ai lava ia le atunuu. Ma o lo o i ai foi le agaga o le Malo e le taofiofia foi ia eleele nei. E i ai foi le fuafuaga o le a taumafai ia le tatou Faigamalo e faasafua atu ia fanua nei aua le atinaeina foi o le tamaoaiga o le atunuu.

Mo le silafia e le na o outou lea e talosaga mai. O le aofaiga o talosaga o lo o i ai le lisi tele lava, masalo e faitau i le afe ma afe tagata e moomia eleele ia i Mulifanua o le Esetete e lisi atu mo latou. Ia o le faaeteetega foi, ia e leai lava ni manatu e lagalaga i lea vaega, ia o ai o le a afisi ae o ai o le a taitai? E pei o le agaga lea, ae lau Afioga ma le mamalu o le Kapeneta ma sui usufono, o le a faapena ona se i talanoa foi le paa ma ona vae. O mea lelei uma lava e faatino, e leai se mea e tuua. Ae afai ua oo atu le faasoa, ia tatou malilie ia i le mea o le a oo i ai le taumafaiga, ia o lena o le vaivai lava ia ma

le tulaga lea, ia tatou onosaia ia le taumafaiga o lau Malo. Ma le faaaloalo lava.

FOFOGA FETALAI: Malo, ia o le toaga lava e faamanatu ma tuitui e tatala ai le faitotoa. Tulai mai le sui usufono o le Aiga i le Tai.

Susuga MULIPOLA LEIATAUA LAKI: Faafetai i lau Afioga, faafetai i lau Afioga i le Minisita mo le faamalamalaga matagofie e moi le saunoaga ma le malelega, ae e le itiiti le agaga faafetai i lau Afioga i nisi o atinae na e tali faaaloalo ai, tulou le paia o le Maota, o nai faleui foi ia e.. garden toilets, i lou uafu o Manono Uta faapea foi le motu mo tafaoga a e tafafao mai fafo, ia faamalo faafetai i lau Afioga. Ia e le mafai ona alo i lea vaega, ia e ta te faalogo i nai toeaia e te oso i lau taavale feilafi, e oso i totonu o le faletioata, ae oso atu i le vaega lea e faaletonu, ia ua oti atoa le pisinisi. Faamalo i lau Afioga ia le amanaia o vaega ia, ua tua i ai le mamalu o le atunuu ma le itumalo i e fegasoloai i le motu i tai ma uta.

Ia lau Afioga i le Minisita o Aoga, ia faamalo faafetai o le faleaoga, ia faafetai mo le galuega na lagolagosua ai lau Afioga, ia faamalo i le Malo o Iapani, o lea ua uma ona faapaia le galuega e pei ona e afio atu. Ia o lena ua e silasila e 8 potu sa faatupe e le Malo o Iapani ia ma le 3 faaopoopo o la ua 11 ai potu, ia faatasi ma le tatou malae taalo ua maau i ai le polokalame o galuega a le Aoga.

FOFOGA FETALAI: Ua maea le taimi o le sui usufono.

Susuga MULIPOLA LEIATAUA LAKI: Faafetai i lau Afioga, ia o nisi o vaega o le a fai talosaga faaSamoa, ia o le tolotolo atu i lou faitotoa, i Afioga i le Minisita, ona e pule le taimi i ai tatou. Ia na o si minute laitiiti lau Afioga i le Fofoga Fetalai se i oo atu i lou itumalo, faamolemole.

Ia, lou itumalo Aiga i le Tai e le tau fesiligia ia lo tatou itumalo, o oe o le pae ma le auli o le feagaiga a Tumua ma Pule, o le Tootoo e tatou te osiosi o tatou te aiga faatasi ma faalupega o le Atua Soifua, ioe. O ia o le filemu, o le Atua malosi, e faapena lagona. E le sii soo le vaa o lo outou sui usufono, ia vagana foi ituaso faapenei, ia ua tatou latalata foi i le faaiuga o le Paeiga, ia maua la outou tofa le paia o le afifio o aiga e lua o Usoalii ma le Alo o le Malietoa ia faapea foi le fetalaiga ia Ati ma Lautolo, ia lau Afioga i le Tapaau. Ia susu foi Sau ma le Aiga ia Sa Sau, Lilo ma le Usoalii, ia faapea le mamalu ia Sauma.

Ia si o matou nuu o Manono, ia malo le lagi soifua ma le lagi matafi, ia viia le Alii i la outou tapuaiga, ma la outou tatalo leleoa, tui le mulipapaga ma feula le mulila, e pei o upu e fai i le sa o le Tagaloga, ia faamalo le paia o le tofa o Alii, o Tutu ma le alo o le Malietoa, ia faapea Futi ma Auapaau, Upu i le Aiga i le Tai.

Ia manuia tele lau Afioga i le Fofoga Fetalai, faamalo le tauatai. E le faigofie ou faiva, ia aua le tau foefoeina o le sa o Samoa. Ia manuia le Afioga i le Taitai ma le Kapeneta ma le Palemene, ia faapea foi ia nai o ta uso Taitai o Matagaluega ma Faalapopotoga, ia soifua ma ia manuia.

FOFOGA FETALAI: Faafetai. Malo saunua i le sui usufono mo Aiga i le Tai. Ma o le avanoa lenei ou te tapa lau Afioga i le Sui Fofoga Fetalai mo lau saunua, o lea lava e lava le taimi e faatomua ai ma faataoto le laulausiva ia aua le faafofoga mai a le itumalo ae tatou te le i oo i le tatou tatou malologa.

Tofa NAFOITOA TALAIMANU KETI (Gagaemauga Nu.3): O le aso ma le filiga, o le aso foi ma le mataigatila. O upu ia a le atunuu e faailoa ai le taua o tiute tauave aua e fai o le tagata e faatinoina le faiva, a o le tapuaiga a le taliuta. O le a le uiga o lea mea? E fai o le faiva o le Maota, a o faiva o Samoa o lo o tapuaia outou faiva alofilima e matau ai i lea aso ma lea aso ma taga e pei ona faafofoga i ai talu ona usuia le Fonotaga a le Palemene.

Peitai, ae ou te le i utufia la le vai i Mataiva o le vaigagana o le Tuiaana, ou te faaeteete ne i ou gagase i Nuuausala. Ae maualuga ia te au fisaga o matagi, e toto ai le sau ma momoli mai ai le malu ma apoia ai le susu i ou laugutu se i ou manatua ai le taua o le faaaloalo ma le avafatafata o le tu ma le aga a le atunuu e laualuga i le vatapuia.

Lau Afioga i le Fofoga Fetalai, ou te tulai ma lou faaaloalo e tatau ai e tusa ma le avanoa ua e tatala mai se i taumafai ai ni manatu o lenei itumalo o Gagaemauga Nu.2 e tusa ma le Tala Faatatau Autu o le Tupe 2020/2021, e faapea foi le Tala Faatatau Faaopoopo o le Tupe 2019/2020 lea ua talanoaina ma ua taoto i lumamea aua lona fia pasiaina.

Lau Afioga i le Fofoga Fetalai, se ua asaasagata le alavaa o lenei taeao, ua le gata ina sousou, ae ua galua foi, e afua i sa folau o itumalo eseese sa asa le gasu o le taeao, ae ui lava i lea, o Matautu o le tautai ua masani i aso faigata, ua masani i le faitauga o galu, ua iloa foi apefoe e sao ai ma vave ona oo i le aloalo, e le tae otaota foi. O lea ua ou manatu ai ua ou tu i Taumeasina ae tepa i Matagofie e pei o upu e fai i le Fale Vaimauga. E afua i se a? Aua o lele ua taufai sunui ao o le lagi, aua le lagi to i ala ma le lagi to i le tai ma le lagi to i le ea ina ua sootuli taitai o le atunuu, lea ua atoa ai le faga i Laua i le Maota lenei. Ua taufai puea ai foi la le matila ma le ofeloa e pei o upu e fai i le gataifale. Lele ua nofoia pou o lauga, ua atoa tupe i le fala e pei o le upu e fai i le matuauu ma le au seepapa. O paia sautuafafafa o le Maota i Tiafau nei e lauvivilu ai tulatoa ma le aufueloloa o le atunuu, fai mai o le Maota o le tagatia, o le Maota o le tagamanu, o le Maota e fesilafai ai tupu ma tamalii ae fetalai ai le faautautaga ma le moe a Samoa aua upufai o lana faigamalo. Ae fai mai foi o le Maota o le Faautugatagi, aua o le Maota e tapuaia e le atunuu i le ao ma le po ia sologa manuia mea uma.

Lau Afioga i le Fofoga Fetalai, se ua se togi lau seu na lagatila i lenei taeao, lea ua e taia le tutafaitoa ma ua e faautuutu le salefu se i tea mea i Matautusa ma momoli lapalapa o malo i Fogaa, a o se tatou utugatufa foi aua le atunuu tofi, se i sula le aao laveai ma le agalelei o le Atua o Sapaota, ona o lo outou soifua maua e i ai lenei taeao na tepa i ula, sei i ula lenei taeao. Malo le fai o le faiva, e le selu, aua o oe lava o le maa faafuagalua i aso faapenei. O upu a le Tusi Paia, “Aua ne i ia te i tatou, aua ne i ia te i tatou se mea e tasi, a o le viiga ma le faamanu i le Atua, ia faasilisiliina lea i mea uma e manao i ai le tagata.” Ae ina ne i ou momoo i ia o le loloto i le avanoa faaauuro ua maua e lenei itumalo, lea ua tatala mai e le Nofoa, ae galo ai ia te au figota o le aloalo, aua o figota ma ona momoga e tali ai le malie ma le manao i aso uma, aemaise i lenei vaitau e ala i lenei Paeaiga, a o lea ua maalo iuofe, ua tau faaiuiu lenei Paeaiga Lona XVI o lenei Palemene. O upu lava e fai i le Motusa, “a oo ina faalele fulu o manuula e muamua lava ona lauvae manu a le Tuimanua.” Po o le a le tele o manu, fai mai le faamatalaga e iloagofie lava manu a le Tuimanua i ona lauvae.

Ae ou te le i taia la le tuluvao ma ou faaumuumutituu le faiva i lepaga, se i nono ni manatu o lenei itumalo o Gagaemauga Nu.2 e uiga i le Tala Faatatau Autu o le Tupe e faapea foi i le Tala Faaopoopo o le Tupe i lenei tausaga, lau Afioga i le Fofoga Fetalai ou te faatulou i le tapuaiga leleoa i le papa le gae o lau Afioga, i le afio o lau Afioga i Le Ao o le Malo ma lau Masiifo, ae a le fala le see i le tapuaiga a le Sui o le Fono a Sui Tofia ma lou faletua. O mamalu lava ia aua le paia o Aiga ma Tama, Tama ma Aiga, le Usoga a Pule ma Tumua, Ituau ma Alataua Aiga i le Tai ma le Vaa o Fonoti. Ae a Aiga o Tupu, Aiga o Nofo, Aiga o Papa ma Aiga na Tafaiifa. Se o le upu moni ua matalupe le seuga i lenei taeao, ua pau le Maota.

FOFOGA FETALAI: Ou te faauilavea ma ou tautaualemau i le saunoaga a lau Afioga i le sui usufono mamalu, o lea ua maea ona e faatulima ma ua faapena foi ona e sii le fale o Asomua i le mauga pei o moomooga o le tamaitai o Tapusalaia i lenei taeao aua le faafofoga tapuai mai a Lana Afioga Mamalu O Le Ao o le Malo, faapea foi le Sui o le Fono a Sui Tofia, aemaise foi o lo oulua afioaga, le itumalo a o se faafofoga tapuai foi a le Palemene, ona ou faapea lea, tofa malie lau Afioga i le Sui Fofoga Fetalai ona o lea ua tatou toai taunuu i le tatou malologa masani, o le a faaauau lau saunoaga pe a tatou taliu mai i le tatou malologa.

Tofa NAFOITOA TALAIMANU KETI: O lou finagalo e faia pea, a o le lelei foi la o le amatamea toe amatamea foi i le isi taimi. Faafetai mo le avanoa.

Tofa Olo Fiti Afoa Vaai: Lau Afioga i le Fofoga Fetalai, ae a pe a tatou o ae lauga pea le sui usufono.

FOFOGA FETALAI: Se malie ia Olo, se soia e te faaleagamea Olo. Ou te faasilasila atu ua faataatiaese Galuega a le Fono Aoa mo lana malologa masani.

Na faataatiaese Galuega a le Fono Aoa mo lana malologa masani i le itula e 10:47 i le taeao ma toe faaauau i le itula e 11:47 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.3) 2019/2020 & Tulafono Tau Faaofi o le Faatatauina o Tupe 2020/2021.

FOFOGA FETALAI: Ou te faasilasila atu ua toe amatalia Galuega a le Fono Aoa Faitulafono.

E faia le malologa o lo o faapena ona saunoa le Afioga i le Sui Fofoga Fetalai ma ou te tapa le Afioga i le Sui Fofoga Fetalai e tulai mai e faaauau lana saunoaga.

Tofa NAFOITOA TALAIMANU KETI: Ou te manatu o lea ua maea le tautega, ua sao i alo foi le taliga o le sua aua le maualuga o le Maota ma ua i ai le talitonuga ua maua foi si faasiliga malosia e faaauau ai galuega o totoe o lenei aso. E masani ona ou alu e ave tuuga fautasi i Sisigafua i lea tausaga ma lea tausaga. A oo la ina pa le fana ma amata ona taotoo vaa ua o, a taofitutu la se vaa o le a filivaa, e i ai le mea e tupu, e toulu foe, aua foi ua le maua le momentum ma le beat a le tigipalau. E manatu foi ua tau faapena le lauga a Gagaemauga Nu.2. Ui i lea, o le tama ua masani e tau.

Ou te manatu o le a ou le oe utuvai lepulepu ae o le a ou utuvai lolo e pei o le tala i le folauga a tama toga aua e le mafai ona alulua se lauga, e ao ona faapoi le nofoa ma le nofoaga, o tu ia ma aga. O le ala lea e ta ai liu ae silasila. Ou te faatulou atu ai i le afio o lau Afioga i le Palemia, lau susuga i le Tama a Punefu, lau Afioga i le Laau na Fausia ia po o lau Afioga i le Aloalii, le susuga i le Alo o Malietoa, lau Afioga Tuilaepa Fatialofa Auelua Galumalemana Dr. Sailele Malielega. Aua e le mafai ona alulua se faamatalaga. O upu a le Tusi Paia, e tatau le faaaloalo i e tatau i ai le faaaloalo.

E faatulou i lau Afioga i le Sao Faapito le Sui Palemia, le saofaiga a le Aiga Minisita ma le mamalu i le vaega i lena Itu o le Malu, Sui Minisita.

Ou te faatulou foi i le ee mai o lau Afioga i le Fofoga o le Maota lau Afioga i le Fofoga Fetalai, o le Maota o le Fono Aoa Faitulafono, o le Malo Tutoatasi o Samoa aua Samoa mo Samoa.

E faatulou foi i lupe papagata, o lupe na faia mai le fuifui e le filiga a le atunuu, o sui mamalu uma o le Palemene ua aofia i lenei Maota. E ao foi ona ou faatulou i le

tapuaiga a lau Afioga i le Faamasino Sili, afioga i alii ma tamaitai o le Faamasinoga e faapea foi le Ofisa o auunaga faa-Faamasinoga.

E faatalofa atu i le mamalu maualuga o Ofisa Sili o Pulega o Matagaluega ma Faalapotopotoga a le Malo ua auai i lenei aso, malo le tautua, o outou lava e lima ma vae i ai le faigamalo, faafetai i le faatoatoa.

E afe foi se matou faamatalaga e faatoulu i le paia o le aufaigaluega galulue a le Atua, e o faanonomanu i so o se fatafaitaulaga e fia o le atunuu, faamalo tatalo, ua malo faiva o le Faigamalo ona o la outou faanonogamanu i le Atua ua mata faigofie ma saogalemu ai mea uma.

Ae ao foi ona afe se matou faamatalaga i le paia o si ou itumalo, e le galo afia i lona vao i Gagaemauga Nu.2. Le paia lava e amata mai i Fanuatanu ma Asofaatau, Mutiatele ma Matautu, ae a Siliga ma Falefaamaoi, o Malae ma Tulaga seia oo i Maloamata, ae matua lava le tuu i lou Malaefono i Fale Fagamalo. Ae a le paia lava lea aua le afifio o le Aiga Sa Peseta ma lo outou Maopu, nofo a Usoalii o le Faleiva, le Aitutagata ma le Faletoalepai, ma upu ia te oe Matautu ma le Faamalualuga o Malo. O oe o le muaautasi. O paia ia ma mamalu e fia o oi ai se faamatalaga i leei vaega o le aso e tusa ma lou tulai. Lo tatou itumalo, tapuai maia se i taumafai so outou finagalo aua le Tala o le Tupe e pei ona talanoaina i le Maota.

Lau Afioga i le Minisita o Tupe, talofa i lau faasoa utiuti, a o lea lava ua matau atu i lau saunoaga ma pepa ua tauaaina i totonu o le Maota lenei ma matou vaavaai i ai, malo galue, malo saili. A tuu se fesili, o a ni mea sili o i totonu o Samoa e faatatau i lona tamaoiga? O le tali, e 3 lava mea, people, land and sea. E le pei Samoa o isi atumotu o le Pasefika, e i ai oa faalenatura e tua i ai lo latou tamaoiga, na pau lava lea, o nai o tatou tagata, o le laueleele ma le sami. A oo mai aso faigata, e le toe tau faamatalaina, sa tutupu foi i aso ua mavae. A faitau i le Tusi Paia, o la e talanoa i ai le Tusi Paia i mea ia. Ma e momoli atu lau faamalo ma le faafetai. Malo le faatoatoa lau Afioga i le Ofisa Sili o Pulega ma lo outou Matagaluega o mea ia o lea e matau mai i ai le atunuu po o fea lea e faatu ai le tila o le tatou vaa a o fea lea e agai i ai e pei ona amata ai au upu i lenei aso. Aua e fai o e fai le faiva, ae i ai le au matau. O le matau a lenei itumalo i le faasoa i le Tala o le Tupe, ua matua lagolagoina lava. O le a le oo sa matou faamatalaga i le Tala Faatatau Faaopoopo o le Tupe 2019/2020, leai. E matua lagolagoina leaga o lea e tau faaae le faiva, faamaea le tausaga faaletupe, a o mea e moomia lea ua matauina i totonu o le Tala Faaopoopo lea. Malo faafetai. O le upu moni lau Afioga i le Minisita, e tele le au faitio, e i ai tagata e le talitonuina mea ia. O le itumalo lenei o Gagaemauga Nu.2 matou te ioeina mea ia, lea e taoto mai le Tala o le Tupe, aua o mea e tatau ona faatini manaoga o itumalo taitasi, aemaise tagata taitoatasi. E le toe oo sau faamatalaga i le maioio o le Tala o le Tupe, o lea lava ua manino i le itumalo lenei auofala.

O tagata matutua, na pau lava o lea, lau Afioga i le Minisita, ou te faafetai atu i le vaega lea o le National ID lea e agai ai le \$50 i le tagata mai lava i le pepe faatoa fanau mai seia aulia se toe tagata. Ou te faafetai au, lenei itumalo

i lea fuafuaga. E mafua i se a? O lea o le a maua ai nai beneficitation a tagata o le uma o le atunuu. Na pau lava si au tuualalo ma se fautuaga i le vala lea, ua manaia tele le ID lea, toe lava o se... pe a oo ina faataunuu pe a tusa ma tulafono e mafai ona fai, faaopoopo i ai ma se finger print, thumb print. E i ai le mafuaaga ua ou tautala ai i le mea lea, e le toe po malae i le Maota lenei, ua leva ona ou fai suesuega i totonu o le Matagaluega o Leoleo ma Falepuipui, o le tulituliaupuina o e na solia le Tulafono, e le faigofie, e taumafai lava le match o le crime seen ma faamatalaga ia e aoao mai. Ae afai e i ai ma le vaega tonu lea, o le tasi lea vaega taua ou te manatu na o au o le a fesoasoani tele i le tatou Matagaluega o Leoleo i suesuega o soligatulafono pe afai e faaopoopo i ai ma le print. Aua e oo mai i le taimi nei, e le o mafai lava, e send i fafo ona e faigata foi ona o le avega o exhibits i fafo ina ia fetau lelei ma taimi e produce ai i luma o le Court, aua nei i ai se lapse i le feuiaiga lea, o mea o DNA. Ae afai la o lea o le a tatou o i le National ID, o le agaga lena, a faaopoopo i ai, ua ou manatu ua lava lena \$50.

Saunoa nisi o sui usufono pei e foliga mai e mama le latou silasila i le mea lea, a o lenei lava itumalo ma lenei sui usufono, e ese le taua ia te au, e tele ona itu lelei. Tasi lea mea e fia momoli atu ai le faafetai tele i le vaaiga mamao ma le silasila mamao a le Malo i le tulaga o le faiga o le tatou National ID lea. Ia faafetai.

Ona oo mai lea o sa matou faamatalaga i le mea sa ou taua i le uiga o mea e tolu i le tamaoaiga o le atunuu lea ua tatou manino lelei, ua faaletonu le lalolagi. O lona uiga, o lea o le a ifo lava le fuiniu i le lapalapa. E i ai lava lou manatu i le Tala o le Tupe, ou te faafetai o lea e pei ua faamuamua mai le Ofisa o Faatoaga, a o le agaga tonu lava lena o lea e taoto i o matou loto, o le faamai e leai se isi o tatou o taofia. It's a wake up call mo le atunuu lenei ina ia mafai ona soifua lava tatou ia i o tatou lava lima.

Ua ou toe tu ma manatu i le tatou Paeaiiga i le sini autu sa taoto ai le Tala o le Tupe i le 2016/2017, live by our own means. Lea la na tatou sau ai lava ma sosolo lelei i le faasologa o galuega e ala i le Tala o le Tupe. O le aso, o lea ua taia le tatou folauga, o le a la le isi option? O le agaga lea, so o se mea lava e tupu e i ai lona aoga. Ia te au lava foi ia ma le matou aiga ma lo matou itumalo, e ese le taua, tele aoaoga lelei ua tatou maua mai faafitauli ua fesagai nei ma le lalolagi aemaise Samoa. O le talosaga, se i toe silasila ane lava i le aufaifaatoaga po o lava le tupe, se i toe silasila ane lava i le atinaeina o le laueleele lea na ou tautala i ai. E tolu lava mea, o le laueleele, o le tagata ma le sami, o Samoa lena. Se i silasila ane lava i ai i le vaitau lava lenei i lenei Tala o le Tupe. Afai e manuia taumafaiga, e tautala le la tausaga i le Tala o le Tupe.

A o le talosaga ma le agaga faaaloalo, se i silasila e ave le faamuamua, switch le priority agai i tatou eleele ma tagata o lo o taumafai e atiae. I le taimi lenei, ua amata ona agai e oo lava i le aufaigaluega, na ona tatala lava

o le ofu faigaluega agai loa i uta. E mafua i se a? E leai se isi mea e toe agai i ai. O le taua lea o le lockdown i lenei itumalo. E taua tele. O le talosaga lena i lau Afioga, e galulue faatasi ai ma le Minisita mo Faatoaga ma Faigafaiva se i toe lalaga mai, aua na pau lava ia o mea tatou te tua i ai. Faafetai i atunuu i fafo, tatou donors o lea e maua mai ai tatou fesoasoani. Viia le Atua, i lo latou alolofa ma le faaso mai. A o le talosaga, tatou o, e pei lava ona i ai le Tala o le Tupe lena, lona sini 2016/2017, Live by our own means. Tatou soifua ma ola i mea lava tatou te maua. Aua o le fesili lea na taua e se tasi o sui usufono, afai e uma nei le Koviti, tatou te le iloa lo tatou luma na o le Atua e silafia, ae toe tulai nisi o faafitauli, a o la e ua lava tapena le laueleele ma o tatou tagata ma le sami.

O le tulaga o le lockdown, lau Afioga i le Palemia ma le Aiga Kapeneta, o le agaga maualuga lava ia ia atiae le atunuu, o le agaga maualuga ia atiae le atunuu. A o le matou tatalo, taofiofi iumaea, aua ana ua maua mai nei se faamatalaga mai atunuu i fafo ua i ai se vailaau ua maua mo le faamai, e avatu nei lava le fautuaga e tatala loa, tatala loa. A o le agaga e tatalo pea, ioe, lea e faafogafoga mai le afaipisinisi ma le atunuu, ne i meaane ua tatou tigaina e afua mai ia Mati e oo mai i lenei vaitau, a o le agaga lena.

FOFOGA FETALAI: Se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o se mea e fia faamalamalama i le tatou Maota nei. E le i suia lava forecasts po o valoaga a Saienitisi o le lalolagi, e faatoa tataua ona maua se tali atoatoa o le mea lenei ia Iuni o le 2021. E na o se faamalamalamaga foi lele, a alu atu lava foi ua toe foi i tua tatou e tau ia Iuni 2021, e aofia ai ma le palota, ia ia malamalama lelei le tatou Maota.

FOFOGA FETALAI: Ia, tulai mai le Sui Fofoga Fetalai e saunoa.

Tofa NAFOITOA TALAIMANU KETI: Faafetai tele, ua foi Sina i Futu. Malo le silasila mamao, faafetai, leaga o ananafi na aoao ai le aso, a o le aso e talanoa ma tapena ai taeao, e le toe moomia e tatou le mea sa oo i le misela. Ae faafetai ua ou faalo atu i lau Afioga ma le taitaiga o le Malo. O moomooga na ne i maumau le tigaina ua alu ae te i ua toe maua lava se isi ma sosolo loa, a o lea ua maua le tali, ua lava lea mo lenei itumalo.

Ona ou oo atu lea e soofau le tulaga o le Aso Sa ou te faafetai atu i le faaso a le sui usufono mo Anoamaa le susuga i le Faifeau, sa ou alu i lena aso ua atoatoa lou tino i le saunoaga, Samoa, honour God. O lea lava la e uu i lou lima taumatau i le taimi lenei lau faaso. A o le agaga foi lena o lenei itumalo, faapaia le Sapati, o oe ma lou atalii ma lou afafine, aua ne i faia se galuega e tasi, ma le tagata ese o lo o mau ma oe. O lau tatalo faaauau ai,

faaauau ai. A lea na manuia lava, pe a ua fai ma le lockdown faasa ma le Aso Sa. Popo le fatafata ma faafetai ae i le Atua, a ua tatou toe foi, silasila i le lagi, na o Ia e maua ai lo tatou mapusaga. Faafetai Samoa, ioe o lena ua outou faafofoga mai, e i ai mea e fai i le Aso Sa, a o le Aso Sa lava ia o le Aso Sa e faapaiaina, keep it holy. Faafetai, faaauau ai i lena. O le taua ia o le taua o le vaalele, e lagolago le itumalo leni. O lea lava i mea o tupe...

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai...

FOFOGA FETALAI: Tulai mai le sui usufono mo Faleata Sisifo.

Tofa Lealailepule Rimoni Aiafi: Atonu se i fai se malologa a le sui usufono mamalu, e i ai lava lau fesili lea i le Susuga i le Failauga, leaga ua faa taliga tagiao foi lea i mea o le Aso Sa, Aso Sa, Aso Sa. Se i faamalamalama mai e le sui usufono, o le a le saoga o le fetalaiga a Iesu? O Ia o le Aso Sa, o Ia e ou le Aso Sa, o lea ua foi mai foi fai ana galuega faamalolo, ma galuega e tatau ona faatino i le Aso Sa. O lea na ou fesili ai i le sui usufono mamalu. Pe ua toe sui e tatou le fetalaiga a Iesu ma le faaaloalo lava.

FOFOGA FETALAI: Ou te faamalulu atu i le fesili a le sui usufono mamalu, masalo e lelei ona ala ifo i tua le fesili. Ae malie o le a toe toso ai foi le lauga a le sui usufono, ae toe 2 minute o le sui usufono. Tulai mai le sui usufono faamaea mai le saunoaga ua maea foi le 2 minute.

Tofa NAFOITOA TALAIMANU KETI: E 2 vaega taua leaga o lea toe 2 minute, aua e te faalavelave Leala. Ou te le faalavelave lava pe a to lou fale. O le talosaga i le Afioga i le Sui Palemia, o le fanua lea i Vaipouli, lea e lisi e le matou nuu ma le matou itumalo. Ou te le iloa po o fea ua fai i ai le mato talosaga. Manatua foi lau Afioga i le Minisita o tina ma tamatai, o lea ua i ai le faiga faavae a le Malo e fai ai district council, ua uma foi ona saina ma pasia le matou development plan, e taitaifono ai le sui usufono. O le agaga o le talosaga, e a pe a faamatuu atu, lisi a le matou itumalo, o le tele ia o le matou itumalo e fia faatino ni atinae. We are isolated i tua i o ae manaomia la, afai o fia o ni tagata...o lea ou te taumafai... afai e fia o tagata i le matou falemai i aso uma e le aunoa, e tatau la ona fai ai ni pisinisi i ina. O le talosaga....

FOFOGA FETALAI: Tulai mai le Minisita o Tina ma Tamaitai.

Afioga Hon Tuitama Talalelei Tuitama: E i ai foi sui usufono sa saunoa i le tulaga lea i taiala ia o itumalo. Ma o lea ua i ai le faamoemoe o le a fai i

ai se tala pe a oo i le taimi e tali atu ai le Kapeneta. Ae mo tulaga lava ia, ua ala ona ou tulai atu ona o lea e taua ai fanua. O le vaega la lea, e le oo i ai se malosi o le tatou Matagaluega. E lelei ona tuu sao mai i le Afioga ia Sala o lo o vaaia ia fanua nei, po o le SLC foi i le Afioga ia Lautafi ia talosaga faapena, ae e mafai ona galulue faatasi lo outou itumalo ma le tatou Matagaluega o tina e faatinoina se faamoemoe faapea e fesoasoani i se talosaga, o fuafuaina mo le faamoemoe e faatino ai ia taiala ia, e pei ona taulamua ai le tatou Matagaluega. E pei o le fesoasoani atu lea.

Tofa NAFOITOA TALAIMANU KETI: Masalo o lea ua manino auofala ua uma ona ou suesue ma o la ua taoto le talosaga i le failautusi le fetalaiga ia Ulu i le tulaga lea, i le Afioga i le Minisita o le Land Board. A o le talosaga a lenei itumalo, faamolemole pe le manaomia ni mental health i o ia matou i le matou falemai. Na ona tatalo atu faapena, ua agiga foi i tala, ae faamolemole o lo o i ai talosaga e fia lisiina e le itumalo, e faatino ai le tele o atinae e fia fai.

Ona faamuliai lea lau Afioga i le Fofoga Fetalai se mataupu o lo o aafia pea ma agiga i le Maota lenei, saunoa nisi o sui usufono, leai o le tulaga o le Nofoa o Saleaula. E le tuua le mea e alu e ao ona ou faamanino. Se i faafofoga mai foi lou itumalo, e le o au na faia le faaiuga, a o le mea ou te faanoanoa ai lau Afioga i le Fofoga fetalai, o le fai o upu, ua leai se Nofoa o Saleaula ua aveese. A o lea e afio mai le afioga i le tama matua. Ou te le malamalama po o fea lea e i ai upu ia. Ou te tatalo atu ai i le paia maualuga, o le Nofoa o Saleaula i le faafofoga mai i le pule a Saleaula, o la lava e tumau. E le i aveesea le Nofoa o Saleaula, o lea e ee mai le Afioga i le tofi o lo matou nuu. Leaga o Lofipo lea e tautala atu. O la e ee mai Faasootauloa, a o fuafuaga o le Malo i ona Tulafono, o lea ua avatu ai isi nuu ia e i ai Samalaeulu ma Patamea ma Mauga ina ia atoa le numera o tagata palota. A o le Nofoa lava o le matou nuu, e le i aveesea, o la e tumau lava. O la e ee ai le Afioga i le sao, le tama ia Faasootauloa. Na ona ou faamanino le mea lea, ina ia aua ne i alu ai se tala, ona o au sa taitaifono i le taimi o le Komiti, a o le agaga lena. Ona faauma lea o se matou faamatalaga, faafetai tele i lau Afioga i le Fofoga Fetalai, mo le avanoa ua matou maua... avatu ai motugaafa i le Malo

Susuga Hon Laauli Polataivao Leuatea (Gagaifomauga Nu.3): Si mea laititi lea ae le i faaiua leaga o lea e agai mai le saunoaga a le sui usufono, i mea foi sa taua i lau i lauga.

FOFOGA FETALAI: O lea ua maea le lauga a le sui usufono.

Susuga Hon Laauli Polataivao Leuatea: Ioe, o si mea laititi lava lea, faamolemole lau Afioga. Nafaitoa, leaga o lea sa taua, o lea foi e te

faafofoga, o la e tapuai uma mai si o tatou nuu. O le mafuaaga lena o lou alu ese ona o lou tulai i le mea lea. Afai e uma le palota lea e sau nei ae le toe sao mai se Saleaula i le palota, e le toe i ai se Nofoa o Saleaula i le Maota. O le uiga lena o le mea lea e fai atu. O lea ua tuufaatasi le Gagaetasi ma le Gagaelua na tatou omai ai, sa e Gagaetolu, ua le toe i ai se Gagaetolu, o lea ua Gagaelua, o le agaga lena o le taumafai atu. Afai e uma le palota e le toe sao se Saleaula, ua leai se Nofoa o Vaituutuu. O le faamalamalamaga lena leaga o la e faalogologo mai lo tatou nuu.

FOFOGA FETALAI: E faamalie atu le sui usufono, ona e talu ai ou te le o maua o lau Afioga lea e te aafia i le mataupu lea, ana e le tulai mai e le maua le tulaga lea. Ae se i tulai mai lau... ou te manatu i le tulaga o le mataupu lea, o lou lava lea finagalo. A o le sui o Gagaifomauga Nu 3 lau Afioga Laauli, o lou lava lea finagalo i lau lava lea faauigaina o le tuufaatasiga. O lea ua i ai nuu palota po o itumalo palota ae le o aveesea ai mamalu o le tatou... o tofiga a le atunuu o Samoa ua uma ona tofi. Se i tulai mai lau afioga i le sui usufono... Malie se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ua ou tulai atu i le mataupu lea, sa ou faasilasilaina i le tele o taimi. E talu ona tatou tutoatasi ma tulai mai le tulaga o le faaopoopoina pea o sui usufono i totonu o itumalo, ona amata loa lea ona lagalaga le mataupu lea. E le tataua ona laaloa le faataua o le toatele o tagata i totonu o se itumalo. Afai loa e toatele tagata i totonu o se itumalo, e tataua loa ona silasila le Palemene, i le tulaga tau faataua o le toatele o tagata ma le latou leo i totonu o le Maota lenei. ona faasolo faasolo mai ai lea o Paeaiga. Fai loa le iuga, teuteu ai ma le Faavae, o nisi o itumalo, o le a tai 2 o latou sui usufono, o itumalo tetele ia. E le gata la ina 2 sui usufono, ae 2 foi palota a tagata palota. O le fofoga lena, na o se fofoga foi lele, e faamalie ai i latou e o mai i totonu o le Maota lenei ma lagalaga pea le mataupu lenei. Ona alu alu lea, sosolo atu i isi itumalo, lea la na i ai itumalo ua latou maua le faamanuiaga lea. E 2 itumalo taitasi ua 2 a latou sui usufono, 2 foi palota a le tagata e toatasi. O le mea la ua tupu ua amata loa ona lagalaga, leaga foi e le o le fofoga lea e tataua ona fofoga ai, o mea nei o mea a papalagi, le mea lea o le palota. Ae le mafai ona aveesea le tulaga lea, e le fetai le tele o le itumalo ua oo i ai, ae na o le tasi pe le latou sui. O lea la ua faamalieina itumalo tetele ae tupu pea, ae pei o Apia nei, ua o mai pea tagata i tua ma alala i le Vaimauga, ma ua amata loa ona talanoa, ua tataua ona toa 3 pe toa 4 ni matou sui, o le a toa 4 sui i le itumalo e toatasi pe afai o le a fai le faiga lea. O lona uiga, o le a 4 foi palota a le sui e toatasi. Ua atili ai ona falo falo falo, ua matua le taitai ona fetai. Aisea? Aua foi o lea ua aumai faiga faapalota, o le a tauau ina ninini ma faiga faaleaganuu. O le ala lena na ala ai loa ona vaavaai lo tatou

Malo, o le a la le fofo e fofo ai. O le a le fofo e fofo ai le mea lea. Ua tupu tele i totonu o le Maota lenei. Ua fia a tatou komisi suesue e tilotilo i ai i le mea lea. E leai leai ma se fofo latou te auamia. E na o le pau lava lea o le mea lea, a tele ia sui o lea itumalo ua o toe faaopoopo ma toe faaopoopo ia sui o lenei itumalo, ma atili ai ona toe faaopoopo ma toe faaopoopo ia palota a le tagata e toatasi. Ae o le Tulafono o le amiotonu i nei mea o faigapalota. E tasi le tagata, tasi lana palota, tasi le itumalo tasi lo latou sui. O le ala lenei o lea na fai ai le Komisi suesue ma taumafai ai loa i le fofo o le mea lea. O le fofo o le mea lea, e tataua lava ona toe tilotilo i le mea o fai e atunuu i fafo. O mataupu ia, o mataupu ta palota e le o ni mataupu faaleaganuu. O lea la na mafua ai ona fai le faiga lea ua fai nei, ua fai le komisi, ma aumai ai loa le fautuaga lea na aumai ma avatu i totonu o le Kapeneta, fai ai le iuga a le Kapeneta, ma aumai ai loa i totonu o le Palemene, talia e le Palemene, lea na faatino ai loa. Ae sa fai faasolosolo. Muamua, vaevae muamua ia Safata, lea na luga lalo ai foi le Maota nei ma le atunuu. Ona faapea o le a matua afaina le aganuu. O le a la le mea na i ai, e le i afaina se aganuu. A fai lava e tupu le faalavelave i lea nuu, e alu lava i ai le auala a na nuu sa i ai e i ai lava i totonu o le itumalo faale-atunuu. E pau lava le mea lea e tagofia, o le tulaga faapalota ae le o se tualga faale-aganuu. O le ala foi lenei o lea na sui ai ma le faaupuga, o itumalo faapalota ae le o se itumalo faaalalafaga faale-atunuu. Ona avatu ai lea o le fautuaga lea, ona pasia ai lea, lotea e le Kapeneta, i le aso 15 Aokuso 2017. O ai sa auai, sa auai uma le Kapeneta, faatasi ai ma Laauli, faatasi ai ma Laauli. Pasia uma le mea lea, leai ma se mea na faasala ese. Lau Afioga i le Fofoga Fetalai, o le faamatalaga lenei. Na o le sui na tulai mai sa saofai i totonu o le Kapeneta, ma ioe i le mea lea, o le matua faalata. Lau Afioga i le Fofoga Fetalai, o le sao lenei. Ou te matua faanoanoa, i se tagata sa saofai i totonu o le Kapeneta ma io i le iuga lea, ma aumai i le Palemene, alu atu i le Palemene alu i o i le komiti o tulafono, foi mai iinei, talia e le Palemene lenei. O lea e alu ai nei le ioega ma o le tulaga lenei lau Afioga, e le aumaia le tulaga o itumalo faapalota e fai ai le tulaga o itumalo faale-aganuu. Ia o le sao lenei lau Afioga i le Fofoga Fetalai. O la la e sao le sui Fofoga Fetalai, e tusa o lana faaaliga sa fai nei.

Susuga Hon Laauli Polataivao Leuatea: Lau Afioga i le Fofoga Fetalai, leaga o lea e i ai si... le mea lea na fai mai, ua lafolafola mai ta te faalata...

FOFOGA FETALAI: Malie le sui usufono, tulai mai Faasootauloa

Susuga Hon Laauli Polataivao Leuatea: Ia paga lava lea, na alu anapo o faaleaga ta ita, malama nei foi le taeo o lea foi ua toe faaleaga ta ita, o le a folo le ona...o le a folo pea le ona o le Nofoa.

FOFOGA FETALAI: Malie le sui usufono... O le soli fono pe afai e fai atu se faamatalaga ae...

Susuga Hon Laauli Polataivao Leuatea: Se ta te ofo...

FOFOGA FETALAI: E manatu foi i le tatou ava fatafata. E faapena se lagona e manatu lava i Tulafono e tausi ai le mamalu o le tatou Palemene, ae manatu foi i le tatou ava fatafata. Se i tulai mai Faasootauloa.

Tofa Hon Faasootauloa Pati Taulapapa (Gagaemauga Nu.2): E matua faanoanoa lava lenei sui usufono. O lea foi sa ou nofo ma ou faalogologo totoa i tulaga o taualumaga. Sa ou tatalo i le Atua e aumai se avanoa ina ia mafai ai ona fai se leo o lenei itumalo. Ae paga lea, ua lote mai o ma o lenei itumalo, a o lea e nofo le sui usufono mo Salega. Lau Afioga i le Fofoga Fetalai, e i ai se taimi ona ou tautala ai lea, ae faaauau taualumaga o le Fonotaga ma lou faaaloalo.

FOFOGA FETALAI: Faafetai i lou finagalo faa-toeaina.

Tofa Olo Fiti Afoa Vaai: Lau Afioga malie lou finagalo..

FOFOGA FETALAI: Malie le sui usufono, e i ai le upu foi lea, o le aganuu e faapena, e i ai le upu foi lea, o le nofomagalafo e iloga malala ola. E faafetai atu Faasoo e le laeia pe tau faafuluina, o le mataupu e fitoitonu ia te oe le toeaina tulou e sala le gagana o le upu e foi mai. E leai se isi faamalamalamaga e sili atu i le faamalamalamaga a le Taitai o le malo, ua ou manatu ua muta ai foi i i le mataupu lenei. Malie le sui usufono.....

Tofa Olo Fiti Afoa Vaai: Lau Afioga e ese lau mataupu lea...

FOFOGA FETALAI: Se onosai leaga o lea ou te fai atu ae o lena e te tulai mai. O le uso lava o le tu soo mai o le le faaaloalo. Malie le sui, aua foi le naunau ta, ae manatu.....ioe manatu i le upega ae le o le ia. O lea ua faapupula ma faamanino e le taitai o le Malo le tulaga lea. e leai la se isi faamaninoga. Ma e lagalaga lava mataupu ona o le tou finagalo foi lenei e tusi le aao i o. Aua le tusia le aao i o, ae galo ia te oe, o lea e foi mai le 3 ia te oe. E tasi e alu i o, 3 ia te oe ma le 4 e alu i le Atua, ona tau mai lea o le matua sese i Sini le mea lea e te tusi i ai. O le mea lea, faamalulu atu, e leai foi nisi mataupu e toe fia faamalamalama o lea ua maea le saunoaga a le sui Fofoga Fetalai. E tau manumanu foi i le tatou taimi. O le mea la lea, e tapa lau Afioga, le alii matua o lena itu o le Maota.

Afioga Peseta Vaifou Tevagaena (Faasaleleaga Nu.4): Lau Afioga i le Fofoga Fetalai. Aumaia se avanoa pe a talafeagai i lau Afioga.

FOFOGA FETALAI: Ua ou faapea, aua ana saunoa loa le Taitaifono ma le sui Taitaifono o le Komiti o Tupe ua tuu atu i le Malo. O lea foi e i ai mea taitasi ia e tai 15 minute, ae ui i lea, ou te faamanatu atu i Minisita lagolago, o Tala lava o le tupe a le Malo, ae le tau fautuaina lea itu. Se i toe saunoa la i le tou Tala o le tupe.... le sui usufono mo Faasaleleaga Nu 4.... pe i ai se mea ua misi ona tuu i totonu...

Afioga PESETA VAIFOU TEVAGAENA: Lau Afioga i le Fofoga Fetalai, e le aumaua lenei laolao lau Afioga. O le agaga maualuga o le faatalofa atu o lenei itumalo i le Fofoga Fetalai. Malo le soifua laulelei. Faatalofa atu foi i lau Afioga i le Palemia, le afioga i le Sui Palemia, faapea foi le aiga Kapeneta. Faatalofa atu foi i le la itu o le Malu aemaise foi o le mamalu i sui usufono. E faatalofa atu foi i Ofisa Sili o Pulega o Matagaluega ma Matagaluega tumaoti o le Malo aemaise foi o le faafofogaaga a lo tatou atunuu.

O paia o Samoa ma paia o le tatou atunuu, o le a taoto atonu o lea ua uma foi ona faataalolo i ai nisi foi o finagalo o sui usufono ona o le utiuti o le taimi ua aumai e lau Afioga i le Fofoga Fetalai. Lou itumalo, se taimi ona ou oo atu lea, ia ae se i taumafai se sao o le tatou itumalo.

Ua ou manatu ou te aumaia le finagalo o Solomona e faavae ai le lauga a le itumalo lenei. Fai mai le mau lea, o se a se mea e tupu, e toe tupu, se mea foi e fai, e toe fai foi. O lona uiga e leai se mea fou i lalo o le la. Lau Afioga i le Minisita o tupe faafetai mo le lipoti o le tupe o le ua taatia i luga o le laulau a Fono. Sa ou faalogologo ma ou matau, i le tele o saunoaga a nisi o sui usufono. I le tulaga lea ua i ai le Tala o le tupe i le 2020/2021. E pei o lea e faamamafa e nisi o sui usufono le upu lea o le deficit. O le manatu o le Faasalele, e leai, we are surplus, abundant, plenty money. O au e le o se accountant, ae ou te faamoemoe i le Atua. Lau afioga i le Fofoga Fetalai, o au e le suetusi, ae pau lava le mea ou te manao ai....

Tofa Olo Fiti Afoa Vaai: Lau Afioga o le mea e fia faasao. Na o lou fia fesili atu lava i le Palemia lagolago, po o le mea o le plenty money po o le plenty loans, ia le uiga o lana deficit la e aumai.

FOFOGA FETALAI: Se faamaulu lau mea faaleotele leo ma lou... se i toe saunoa se i...

Afioga PESETA VAIFOU TEVAGAENA: Soia ia e te faalavelave Olo, laa e toe sisia foi le lauga. Ua matau lava e lou nei sui usufono le upu lava lea, le upu lava lea. Ona ou manatua lea, le taimi na valaau ai le Atua ia

Aperaamo, osi le taulaga. Ae o le a le mea na tupu? Na deficit foi lea toeaina. Ua le iloa le mea a fai. Lau Afioga o i na test ai e le Atua le faatuatua o Aperaamo. Po o talitonu Aperaamo i lona Atua, ua vaai atu Aperaamo ua le iloa po o le a le mea o le a osi ai le taulaga. Talitonu lava le Atua i le faatuatua o Aperaamo.

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai, e maua lava se avanoa? E fia faamalamalama faamolemole.

FOFOGA FETALAI: Faapuupuu mai....

Afioga Fuimaono Teo Samuelu Teo: O lea na saunoa le sui usufono i le amatataga na amata ia Solomona. O lea ua oo ia Aperaamo ae le faamatala mai Solomona. Ae fesili atu po o fea le bank lea na bank ai Aperaamo lea e maua ai le deficit.

FOFOGA FETALAI: O la e i totonu uma lava o le Tusi Paia ia Aperaamo ma Solomona. Se i tulai mai le sui usufono e faaaauau le saunoaga.

Afioga PESETA VAIFOU TEVAGAENA: Taumafai e sui mai i le ekalesia lea ou te lotu ai. Ioe, lau Afioga o lea ou te taumafai e faamalamalama le tulaga lea, ona o lea e pei e vevesi le Maota lenei, i le upu lea, le upu lea deficit... Na i ai lava se mea na tua i ai Aperaamo? E leai se mea. Leai se mea, o le mea tonu lava lena o lea e i ai le upu lea. O le upu lea e pei e fefefe ai le Maota pe a tau, pe a sau i le Tala o le tupe. A e o le manatu o Faasaleleaga, surplus. Aisea? Faamoemoe i le Atua. A le foai lea a le Atua, foai lea a le Atua, o lea aso ma lea aso, fai mai Solomona, o le tausaga ma le mea e tupu ai. E sau le aso ma lona ai, o le fuata ma lona lou. A lea ua tatou vaavaai, ua tatou vaavaai i mea lelei, e aumai e le Atua ia i tatou. Leaga o lea tatou te tilotilo i mea ia, mea ia o tupe, fai mai Solomona, fale sa ia te au, o lafua manu tetele sa ia te au ma ario sa ia te au, ae a oo mai le oti. Ona tatou faapea lea, aue le oti e, ua ou le manatua. Ua tatou le manatua, o la e faafofoga lau Afioga. Ua ou le manatua ua tatou le manatua mea sa tatou faia, o mea sa tatou faia, aua o mea uma lava tatou te faia i lalo o le la, o ai ia o le matagi. Lau Afioga i le fofoga Fetalai, o le ala lena na ala ai ona ou talanoa i mea ia. E oo foi ia te au, o lea foi ou te deficit. O lea ou te fai atu, e oo uma lava ia tatou uma lava, we are all deficit. Na tatou ola mai le lavalava, o mai e leai ni mea. O le a la le mea e ala ai ona tatou pisa i le Tala o le tupe. Faalogo soo lava i le mea lea lau Afioga, saunoa i ai le taitai o le Malo, aua le fefefe e fai suiga, ua outou vaai i la atunuu, tauva i le masina. Ae a Samoa, o le tau alu ifo lava i luga tuu i lalo, alu atu lava i luga toso i lalo. Saunoa soo lava le Palemia i le mea lea, ona ou manatua ai lea o le tatalo, 1930. Tatalo lea is a small prayer, very very little prayer. E iloa uma

lava e le au kerisiano, ou te le iloa ia Leala pe malamalama ai. Fai mai le tatalo, o le tagata leni he is a Theologian o le Tusi Paia. Ioe, o le igoa o le tagata nei o Reinhold Niebuhrd. Na lauga na tatalo ai le tagata lea. Atonu foi e aoga le mea nei aua o lea ou te vaai i le tele o Matagaluega a le Malo, e pei e faaavanoa le latou itula malolo foi lea, e latou te study ina ai le Tusi Paia which lau Afioga, e tatalo atu i lau Afioga i le Minisita o Tupe, a o i ai ni tupe o lava, faaavanoa nisi tupe e fai ai ni tatou Theological College. E o i ai le mamalu o le atunuu. Ioe, e oo foi ia tatou ia, e tatou te leiloa pe tatou te toe omai.

Ioe, ae o lea e maua le avanoa e tatou te o ai i i i lea mea. Ioe fai mai le tatalo a le Polofesa lea, *“Father God, grant us the serenity to accept the things that we cannot change, the courage to change the things we can, and the wisdom to know the difference”*.

E ese le manaia, o le puupuu ia. O lona uiga, tatalo le tagata nei i le Atua, i mea e le mafai ona tatou suia, ae na o le Atua e suia. Lea na saunoa le sui usufono o Anoamaa, i le aso na saunoa ai, e na o mea lava e fai e le Atua, e le mafai e se isi ona suia. A o mea e fai e le tagata, o le a le mea o le a le mafai ai? O le a le mea o le a le mafai ai? O le ala lena o lea ou te fai atu ai i le tusi lea. O mea e tupu e toe tupu, o mea e fai e toe fai.

E pei lava o le tatou Faavae. Ua uma ona taoto faavae. O lea e taumafai ia lo tatou Malo e toe teuteu, ina ia teuteu atili. Lelei, lelei atili. Faamausali, aisea? Ina ia manuia le atunuu. E faafefea na alu i luma le Malo pe a na o le nofonofu, nofonofu? E le faapena le faiga o le Malo. O le agaga lena e momoli atu ai se sao o leni itumalo, ona o le tulaga o lea e i ai le mafatia lea e tulai mai, i le lalolagi i le vaitaimi leni.

Ia lau Afioga i le Minisita o Tupe, ia momoli atu le agaga faafetai, e pau lava lea o lau tatalo, aua a silasila i le tele o Matagaluega a lo tatou Malo, e pei se agaga fiafia ia te au, ta le 12 a ta fia alu atu e vaai se CEO po o... e pei o le NPF, ia o le matou Matagaluega o le Attorney General, e pei lava ou te faalogo foi o lea e faapea foi i le Matagaluega o le Soifua Maloloina. E momoli lau faafetai atonu o lea e faapea uma isi Matagaluega. E foliga mai ia te au, e ta loa le 12:00 i lou taimi malolo lea, aua o le mea moni lava e le pepelo, o la e faafogafoga mai CEO. O le itula lea ou te alu atu e asiasi atu ai i mea ia, o la e fai ia latou sailiiliga i le Tusi Paia. O faigalotu e faafetai i le Atua.

O le agaga lena lau Afioga le Minisita o Aoga, toe silasila ifo lava i le mea lea. Afai e faavae i le Atua Samoa, fai se Kolisi e o i ai le mamalu o le atunuu. Aua o lea tatou te vaai nei i tupulaga la e pisa i tai i le maketi. O le uiga lena o se talosaga a leni itumalo, aua e aoga foi mo le Maota leni. Ioe, a tatou malolo ua leai ni Fono, tatou o i ai, at least one hour for God. Ioe, one hour for God. Ua lava lea, ua lava lea.

Ia lau Afioga i le Minisita o Pisinisi ma Alamanuia, ia o se talosaga, a o se tualalo foi a lou nei sui usufono. O lea ua tatou vaavaai ua alu i luma ma

siisii i luma le atinaeina o galuega a lo tatou Malo. Ua built i luga ia tele o faletetele ona o le laiti o eleele ma fanua iinei le taulaga. O le talosaga a lou itumalo ma au nei, se i toe silasila ifo lava lau Afioga, i le tatou APTC la e i uta i Vaivase.

Faafetai lava i lau Afioga ona o le tulaga foi lea i le faa-aperenitisi. O lea ua matagofie ia le level lea e aoaoina ai alo ma fanua a le atunuu i le tulaga lea. Ae o le mea lea e manaomia, aua o le faigata ia o le iu mai o le tamaitiiti, ona a maua galuega i faletetele ia o le mea moni lava e tau aoao mai i ina i latou ia alo foi ma fanua.

O le isi mea, o le tele lava o skills nei, e moi lava o la ua lelei le palama, faimoli, o le welding, ia faakamuta, ae tatau lava ona i ai i ai latou, tomai faapitoa mai fafo e aoaoina ai le siakiina o galuega. Aua ou te faim atu o le matata lea o le uelo, ia o lea o le a ou fai atu, ona e le po se lilo lau Afioga, o lou foi tomai lea mai le Atua.

E pau lava lea o le matata e tutusa lelei lava ma le matata le o le Faafomai. E le sese lau faamatalaga. Leaga a e alu e te mai, e siaki oe e le fomai. A siaki, siaki e le maua i le siaki lea, ona fai mai lea o le fomai, o le a x-ray oe. Ia o la e te tilotilo atu lava i le screen, e iloa lelei atu lava le malosi o le tata o lou fatu. E tau mai foi i i mea la e faaletonu. E tutusa lelei ma le matata lea. Ae o le faalavelave, o lea e le o i ai i totonu o lo tatou atunuu ia le tomai lea.

A faapea e pei ona ou fai atu o lea ua built i luga ia galuega tetele e faamoemoe nei galuega i pou uamea ma fale ma iviivi. E carry uma e iviivi nei ma beam nei le weight, o galuega tetele nei. E faafefea ona e iloa le malosi? E faafefea ona e iloa le malosi? E le mafai ona e iloa le malosi, you have to x-ray. Yes, x-ray e pei lava o se laptop, yes I've been there. E te amoamo a e i ai tagata faapitoa e lava le tomai, e te alu lava i luga o le fale, uma na uelo lea iviivi, tuu atu le x-ray. Oloolo le x-ray ma e tilotilo i le screen. E tau mai lava i i aua o la e i luga o ata o fale, o le aofaiga lea o maila aua e 200 maila i le itula, e te ueloa le sooga lea. Tuu atu loa le screen e le au i luga, aua foi e te vaai atu lava i le patu la e tau mai a. O lona uiga e le o lava le malosi, e le o lava le malosi. E tau mai foi e le screen lea, ia mo mea o pin holes, pin holes mea foi ia taupatupatu o le uelo e le lelei e le malosi. O lona uiga e vaivai le setiina o masini, e pei o under cut, under cut o le uelo. E tau mai ai foi i ina e le o lelei le setiina e le o lelei le ueloina o sooga nei. E le o ausia le malosi.

Afai o lea ua sau nei ata o fale, o se mea faapena lea e tau fai atu lau Afioga

Afioga Hon Lautafi Fio Selafi Purcell (Minisita mo Pisinisi, Alamanuia ma Leipa): Lau Afioga i le Fofoga Fetalai...

FOFOGA FETALAI: Toe 2 minute o le sui usufono. Se i tulai mai le Minisita o Pisinisi ma Alamanuia.

Afioga Hon Lautafi Fio Selafi Purcell: Ia, se i fai sina malologa a le Afioga i le sui usufono mamalu. Ae ua ou tulai atu, ona o lea e lauga le sui usufono i a tatou tatou tagata foi ia trade. O le taumafaiga lava lea i lalo o le Faa-aperinitisi, o i ina e amata ai ona lelei le tomai e amata ai le trade lea. Ma e o atu i tua i falefaigaluega la e faigaluega ai, ia ua i ai le tomai e latou te tauaveina ai ia galuega o la e tataua ona ave i ai lo latou tomai lea.

E le faapea foi e uma mai loa le Faa-aperinitisi sau loa uelo atoa le fale. Pe uma loa alu loa palama uma faletetele o le Malo. O la e fuafua lelei foi lava ia level e i ai ia se i toe maua foi ia le isi tomai, e agai agai faapena, ona oo lea i le... e le faia i se 1, 2, 3 tausaga ituaiga tomai lea e manaomia i galuega tetele.

O i ai foi latou o lo tatou Malo ia ma le Private Sector, o lea e latou te o e asiiasi mea faapenei. E i ai ia galuega o le tatou Ministry of Works, e i ai foi ia o latou tagata e o i tua e pasi ia fale nei, ia ma fai ia malosi o fale. Ia atonu o le ituaiga level lea e talanoa mai ai ia le sui usufono, ia ai o ituaiga fale foi ia o lea ua amata ona oo i ai. Faafetai foi tele i le sui usufono o le manatunatu aua e oo lava i ai tatou i ituaiga faletetele faapea, ae o lea e gaiou atu lava le Malo, ia tatou built up ia le tatou foi lea skill, labour force i mea ia tau trade. Ia oo ane i le tulaga e fai ai ia ni faletetele, o i ai ni tatou tagata, a ua tataua foi ona i ai tagata e o e pasi fale, inisinia faapitoa, i totonu o lo tatou atunuu.

O le tulaga lea e i ai e, o tagata lava e faia fale, ia e aumai lava e latou le tagata mai fafo pe afai e le o i ai ni o tatou tagata agavaa i lenei taimi. Ae o lea ua ou faalogologo atu i le sui usufono, o le tasi la lea faiaoga e tataua ona alu i uta i le APTC, e faasafua mai ia lona tomai faapitoa lea ou te faalogo atu lea sa i ai i ituaiga uelo eseese nei. Ia o lau talosaga i si ou uso, ae e le toe tu mai i le palota, o lau galuega tonu lava lea o le a tuu i ai oe e le Matagaluega lenei ma lou faaaloalo.

FOFOGA FETALAI: Ia se i tulai mai le sui usufono e faaiu mai foi le saunoaga.

Afioga PESETA VAIFOU TEVAGAENA: Faafetai i le Afioga i le Minisita, faafetai o lea e matau atu, o lea e te amanaia ia le tuualalo a lenei sui usufono.

Ia lau Afioga i le Minsita o Turisi, ia po o le Matagaluega foi lea Tau Mavaega, ia e na o se tuualalo atu lava ma le talosaga ia ona o lenei lava mataupu masalo e ta te matamuli, matamuli lava ou te oo atu i le tele o taimi. Ia na o se talosaga lava, ia o lenei e i ina le uta. O lenei e i ina le uta i lau Afioga. O le a se auala e mafai ai ona vave ona faatino ia tulaga? Ia pe e le mafai loa fai se Komisi e vave ai ona faatino talosaga a le mamalu o le atunuu, ona o fanua nei. E pei foi ona saunoa ai se tasi o sui usufono, o fanua nei e finau ai aiga, ia ua fau ai nisi pisinisi e ese mai i tagata e ona. Ia ae o

lea e nonofo ia tagata e ona ia eleele. E pei o le agaga lena e na o se tuualalo i lau Afioga, ia o le a taoto atu ma lafo atu i lau Afioga i le sao fetalai lau Afioga Sala.

FOFOGA FETALAI: Faaiu mai le saunoaga, oi, ia se i tulai mai le Minisita o Turisi.

Afioga Hon Sala Fata Pinati: Avea ia le avanoa e tali atu ai foi i le saunoaga a le sui usufono mamalu. Ua ou iloa e pei ona aumai ia le mataupu lenei, ia ou te manatu o se mataupu taua tele. Ma e ao foi ona lava papale mai, a maea le Fonotaga i lenei vaiaso po o lea vaiaso, ia ona o tatou toe talanoa lea e tusa ai ma le mataupu lenei. Aua e moni a au, o le tulaga lea e pei ona i ai ua... o isi mataupu ua oo i le tai 20 tausaga, savali nei le 30 tausaga e le i maua lava se faaiuga. Ae o le a faapea ia lafo maia lou faatuatuaga o le a tatou galulue i ai ia vave ona sailia se vaifofo. Ma le faaaloalo lava.

FOFOGA FETALAI: Ia malo, faaiu mai le saunoaga.

Afioga PESETA VAIFOU TEVAGAENA: Faafetai i lau Afioga le sao fetalai lau Afioga Sala, ia i lau Afioga i le Minisita o Galuega ma Atinae Tetele, ia faamalo faafetai, faamalo galulue. Ia o se manatu lava ma se talosaga a lenei itumalo, ona o le auala o si ou nuu i Puapua, ia leai o le auala ua uma ona faata. E le o se auala e faata. E pau lava si mea e na o le fia faaleleia e le o se faataina, ia oo i le mea lea e i ai maumaga e fia galueina foi e le mamalu o lou nuu. Ia e faapea foi i le auala lea e pei ona ou talosaga atu ai, leai o auala ua uma ona faata masalo ua ova ma le 12 tausaga, ia ae na ona toe teuteu lava.

Faafetai ua aumai le tofa i lau Afioga, o lea e faafofoga mai si ou nuu o Lano, o lea ua aumai o le a amata ona faatinoia ia le tatou auala sima lea e tulai mai ai le tele o faalavelave, ia aua o lea ua maea ia le auala laupapa o Maliolio. Ia ae faafetai o lea ua aumai le tofa i lau Afioga, o lea e sosoo mai ma i Lano, o auala nei e fai lava si faigata, tele foi ola ma soifua ua maumau. O le mea lea e na o se tuualalo lava i lau Afioga.

Lau Afioga i le Minisita o le Soifua Maloloina, faamalo onosai, faamalo onosai. O mea e tutupu mai i le lalolagi, ae afaina ai foi le tele o le atunuu. Ia faamoemoe lava i le Atua mea uma. Faamoemoe tiute ma galuega, momoli le faamalo i le afaigaluega, e le faigofie le faafeagai ai aemaise pasese o vaalele nei lea e taumafai le Matagaluega e puipui le saogalemu. Ia o le a ea le mea o le a mafai? A omai tagata mamai e mamai atu ai ma le Matagaluega. Ia lau Afioga i le Minisita o Tupe Maua, ia faafetai faamalo le galulue ona o le vave o lou taimi ua ou le oo atu ai i isi tulaga. Ia le Minisita o Tupe, o lena ua ou tatalo atu lau Afioga, lagolagoina amuia lau Afioga.

Saunoa se tasi o tuafafine ia Gatoloai i le po anapo se ua ta mitamita. Aisea? Leaga o le atufaasalele lea ua e seei i le Nofoa o le Minisita o Tupe, faafetai. Atonu foi o se tulaga lelei lea i le faafogafoga mai o Salelologa i le falefia ma le falesalafai. Lea ua e seei i le Matagaluega maualuga o le Malo e faasoasoina le tamaoaiga o le atunuu. Faamalo faafetai. Ia lau Afioga i le Fofoga Fetalai, na o sou fia oo atu lava i si ou itumalo na o sina minute. Ia, le tatou itumalo faafetai mo lo outou talileleia o le Komiti faa-Palemene. Ma e sa ou faalogologo lava i lo tatou itumalo i se tali mai a o lea ua lagona i tino matagi lelei le aloaia ma le talia e le tatou itumalo aemaise le tatou nuu Tulafono o lo o taumafai ai le Malo e faamanino ma faamalamalama. O le mea lea e lagona foi i ou tino ia le tulaga foi o le faigapalota. Ioe, aua e faapena lava mea. Ou te fia faatalofa atu foi i lau autaaalo o lea o le a matou fetai. Ia, lau Afioga le Paia o Satuala, afio o aiga Sa Vui ma le Falefa o lo outou aiga aemaise foi le paia ia te oe Falenaoti, le alalatai o le matua fetalai ia te oe Malae, tama ma tina matutua o si o tatou nuu i Lano. Ona ou oo mai lea i si ou nuu i Asaga i le afio o lau Afioga Matafeo ae faapea foi le alalatai ia te oe le matua fetalai i lau Fetalai Luluataua aemaise foi le Fetalai ia Leatuavao aemaise le mamalu ia te oe Salepatu faapea foi le lautele o si o tatou nuu. Onosai e le o toe umi o tatou feiloai.

Ona ou oo mai lea i si ou nuu mulimuli lau Afioga i le Fofoga Fetalai, le nuu e pele i lou loto na ou ola mai ai o Puapua e mamalu ia te oe le pule. Ia o le pule lava o lena e i ina e le pule Peseta. Pule lava lena e uu ia te oe le mamalu i le nofo a ituaiga. Ioe, paia i aiga nai ou tama ma nai ou tina matutua o lo tatou nuu. Faamalo le tapua'i. E ui lava ina fai si umi tatou te le feiloai, aua le popole, vaiaso fou tatou feiloai. Ioe, e pei lava ona fai mai le poto o Solomona, e sau aso e alu atu aso. O le mea lea lau Afioga i le Fofoga Fetalai, faamalo le tapuai i lau Afioga. Lau Afioga i le Palemia, e momoli faamanuiaga a lenei itumalo i lau Afioga ma le faafetai tele, ona o atinae tetele a si o tatou malo faapena foi i le Sui Palemia ma le Kapeneta.

Lau Afioga i le Taitai o le Maota, faamanuia le Atua i lau Afioga, o a foi ni mai o le tino o feagai ai ma lau Afioga ia foai pea le malosi ma le soifua laulelei. Tatou feiloai i le isi Paeaiga faapea foi le mamalu o lenei maoa. Manuia lenei fonu.

FOFOGA FETALAI: Faamalo faafetai le saunoa i lau Afioga i le sui usufono mamalu o Faasaleleaga Nu.4. Ia, ae se i tuu atu le avanoa i le sui usufono o Falelatai & Samatau. E fia saunoa uma sui ia e le itu lea...oi na o Faasoo, ia ua vave foi la... Ia saunoa ia le Aiga Tauaana.

Afioga Taefu Lemi (Falelatai ma Samatau): Malo faafetai. Faatalofa atu i lau Afioga i le Fofoga Fetalai.

Afioga Afoa Amituanai Faleulu Maui (Palauli Sisifo): Faamolemole lau Afioga e fia maua foi se avanoa o Palauli...

FOFOGA FETALAI: Pau lea o se sui usufono ua faatonu le Fofoga Fetalai. O le a fai lau sala o le a fai le mea e te finagalo i ai. Tulai mai le sui.

Afioga TAEFU LEMI: Ia o lea lava sa ou taumafai atu i lou uso a faipule ia Afoa o lea o le a ou afea le TV Bingo ae tapuai ia oe ina ia manuia le ta lauga. Faafeiloai atu i le paia o le maota i lenei vaega o le aso, faamalo le usufono. Taliga lava e fialogo suifefiloloi o finagalo foi ua faalia aua lava le Tala Faatatau o le Tupe.

O le mea la lea e fia faatalofa atu i lona tulaga aloaia i le Afioga i le Fofoga Fetalai, lau Afioga i le Palemia ma le Sui Palemia, le Kapeneta, Minisita Lagolago aemaise le lavalaoa o lenei Palemene i ona tulaga faalupe. Ofisa Sili o Pulega o Matagaluega ma Faalapotopotoga a le Malo, lau Afioga i le Failautusi o le Ofisa o le Fono Aoao Faitulafono ma lou Ofisa. Le tapuaiga a Samoa, le afio o lau Afioga i Le Ao o le Malo lau Afioga Tuimalealiifano Vaaletoa Sualauvi II ma le Masiofo ia Faamausili. Lau Afioga i le Sui o le Fono o Sui Tofia Le Mamea Ropati. Lau Afioga i le Suafa ma lou faletua. Faatalofa atu foi i lau Afioga i le Faamasino Sili ma le maualuga o le Faamasinoga. Taitai o Ekalesia e fia a o auauna tofofi a le Atua aua le tausauina o le ipuvai o le ola i itu e fia o Samoa. Le faafofogaaga a Samoa i lana tapuaiga leoleoa. Faamalo lava le tauatai malo foi le faatoatoa i lo tatou atunuu, faigata le afiafio o paia i aiga ma a latou tama, tama ma o latou aiga, le usoga a tumua ma pule ituau ma alataua aiga i le tai ma le vaa o fonoti. Paia i si ou itumalo, paia i le aiga tau aana ma latou tama.

Ou te faatalofa atu i le Afioa o le Falefitu Leatitagaloa ma le maualuga o lo tatou itumalo i la outou tama sa o tatou saili malo ai, la ua nofo mai lona nofoa ma faaaloalo ia te ia Samoa. Afio Faasavalu ma lona aiga Salu ma Vaepeau, tama a tausala ma le usoalii. Alaalatai Galuefa ma Falelatai ma tagata o le vavau. Si ou nuu i Samatau e afiafio ai le falefa o le usoalii ma le gafa, Fiamē ma le tamaitai ma le nofo i ituaiga ia te oe Leulumoega. Malo le taputapuai, faafetai tatalo. Lau Afioga i le Fofoga Fetalai, e momoli le faamalo ma le faafetai i le Minisita e ou le Tala o le Tupe e tusa ai o le tapenaga maeaea a le Matagaluega ma lo tatou Malo mo le tapenaga maeaea o le Tala o le Tupe. Ia faapena foi ona faamalo atu i le Komiti o Tupe, le Afioga i le Taitaifono ma le laulau mo le lipoti ua tapenaina. Faitau lava ma le totoa, o ai lava ia e tuliloa mai lea Paeaiga i lea Paeaiga, o taumafaiga lava ina ia up to date a tatou annual reports a Matagaluega ma Faalapototoga. Ia o lea lava e tulituliloa lava ma manaia i le vaai ma faitau ai. Faitau atu i le lipoti o la lava o lo o faaauau pea ia galuega. Ia o nisi lava taimi e i ai o tatou manatu foi lea i le tele o nei mau pepa e lau mai e faitau, o isi taimi tatou te o ai lava ae tuu ai i i e faitalia le Failautusi ma le latou Ofisa ma le faiga e

fai ai. Ia ae o lea lava e avanoa le tatou masini e tuu ai i luga a tatou annual reports sefe ai na tupe e tau print ai. Faitau ai foi i le tatou Printing lea e i le Matagaluega o Tina ma Tamaitai, ia talu lava ona fai lena Printing o lo o fia ola lava po o lo o deficit foi e pei ona saunoa ai nisi o sui. Ia, fai ai se fua aua ua tele le competition, pe le tuu loa i tua la tatou printing...

Afioga Hon Tuitama Talalelei Tuitama: Lau Afioga i le Fofoga Fetalai...

FOFOGA FETALAI: Malie le sui usufono se i tulai mai le Minisita o Tina ma Tamaitai.

Afioga Hon Tuitama Talalelei Tuitama: Ou te tulai atu ma le faaaloalo i le sui usufono o lo o saunoa, a i ai se taimi ona ou tali atu lea e tusa ai ma le Printing leaga o lea foi sa laga e isi sui usufono. Ae na ona o se mea e fia faasao, e le o gau ia le tatou Printing o la e make.

FOFOGA FETALAI: Malo, faafetai.

Afioga TAEFU LEMI: Ia faafetai i le faamalamalama a lau Afioga i le Minisita. O le vaega lea e atagia mai i le lipoti. Ia o poloketi foi ia i Matagaluega o Tupe ma isi foi Matagaluega, ia ua tau au ina oo i le 3 tausaga e le i faia lava i ai se galuega po o faaaauina ona faamanatu foi lava ona o le tele lava o Poloketi e faatupe mai fafo ina ia faaoga tatau ma tatou lipoti atu i le faaogaina o nei seleni. Ia ae faafetai tele i le lipoti a le Komiti o Tupe, ia mo le fesoasoani foi i le malamalamaaga atili, ia o le tatou Tala o le Tupe.

Ae momoli faafetai i le Malo ma le faafetai i le tatou Faigamalo e tusa ai e le faigofie ia lenei vaitau. Vaitau o le tatou SOE lea e fai. Ia e matau mai lava ma le totoa le tau amataga maia, e tau faafaigata ona malamalama ia le atunuu.

Ou te vaai atu i nisi o taimi e pei o le a tau faanoi tau faamalieina ia mafutaga a Ekalesia, Soofaatasi ma tau faailoa i ai ia tatou tapu o le a fai. Ia ae talitonu lou sui usufono e eseese lava ia malae ia e tatou te taaalo ai. O le tala lava i le uto ma le maene e galulue faatasi. Ia ae e le faia e le isi ia le galuega a le isi. Ia o lata lea matau ae o se faamalosiua i lo tatou Malo, aua o le isi lava lea mea e le o silafia e nisi, ia po o a lava ni malosi o i se Malo, ae fai loa le State of Emergency, ua i ai loa ma isi malosi faaopoopo. O le mea la lena ou te iloa e le o maua e nisi, ia o lea e i ai ai pea le agaga lea o le fia fesilisili pea, ma fia malamalama atili i le faiga o tatou SOE.

Ae e i ai itu lelei o le mea sole, e i ai itu lelei o mea nei o SOE ua ta vaai ta ita i ai. O mea o aiga i le lotoifale o le tama ma le tina, ma le fanau, mafuta ma mafanafana e talanoa ma faaleleia atili le lotoifale. E i ai itu lelei o le

tatou SOE o tatou aoga polokalame i luga o le TV faafetai i lau Afioga i le Minisita. Faafetai mo ia galuega lelei e le toe aloese lava i le gasologa o le soifuaga lenei ma na mea o le atinae ua i ai.

Ia o isi lava aoga lea e fai mai i luga o le TV, ua uma mea ia o tutorials foi ia sa tau totogi ai e matua tupe, pe e ave ai ia latou fanau ae o lea ua sasa mai ai le TV, TV uma lava. O la ua sau uma lava i le TV ma ua o tatou aoga uma atu ai lava ma tatou. Ua toe faamanatu mea o Math i aso la ma tulaga faapena. Faafetai tele i le Matagaluega o Aoga e lem gata i lea o Ekalesia, i a tatou polokalame lea e fai mai i luga o le TV.

Ou te faamalosiau foi i nai faiaoga, ou te vaai atu ua lifi le morale ma le confidence o nai faiaoga e tulai mai ai. Ai lava o nai laei lelei ia o nai faiaoga, o latou sei ma tautaliga ia e aulelei ai le tulai mai i luma o le TV, e ese le manaia. Ae o le agaga maualuga, e faaauau ai i lea faiga. E le toe foi i tua le agai o le lalolagi lea e i ai, e agai pea e faaauau ia le technology ua available ma faaauau pea isi mea o ia faamai ua sau nei, ia ma o tatou talitonu e le toe foi lava. Uma atu lea faamai sau lea faamai, faaauau pea ona tatou faalagolago i fesootaiga vavave nei, e faatino ai ia tatou aoga.

E i ai isi atunuu lau Afioga i le Minisita o Aoga e tai 3 aso e aoga ai tamaiti. E le o se latou mean a fai nei i le tapu, o le latou lava lena polokalame masani. E 3 so aoga o tamaiti, ae o le isi 2 aso e fai ai fesootaiga ia i fesootaiga vavave. Ia o mea e aoga ia, ou te vaai atu, o le fofo lea o le tauaimisa lea o le tauaimisa o tamaiti ma le tauaifusu lea e fai i aoga. O le faia o le meaaoga mai luga o le TV, initaneti mai le fale. Ia o la ta ita lea ao se faamama avega...

FOFOGA FETALAI: Ou te faamalie atu i le sui usufono mamalu o lo o saunoa, ona talu ai o lea ua tatou taunuu i le taimi e faia ai foi le tatou malologa, ae o le saunoaga ua logo faatutuila le manaia o le saunoaga i le tulaga o lo o i ai. Ia e faafetai atu, ia ae o le a toe faaauau lau saunoaga, ia pe a toe taliu mai ia le tatou galuega i le taimi o le tatou Fono i le afiafi pe a ta ia le itula e 6:00pm.

Na faataatiaese Galuega a le Fono Aoao Faitulafono i le itula e 12:57 i le aoauli seia aulia le itula e 6:00 i le afiafi.